

Tuhun vaha nacahyí Marcos saha Jesucristo

Tá jácandúta Juan ñayivi yucú íchí

(Mt. 3:1-12; Lc. 3:1-9, 15-17; Jn. 1:19-28)

1 Quiahva johó nacava sáhá tuhun vaha cáhan saha Jesucristo, mé a cúu in túhún jini já jahyi Ndióxi.

²Sanahá nacahyí profeta Isaías ña nacahan Ndióxi xihín jahyi a. Já cáchí a já:

Chindahá i in da canuú cuhun nu mún,
ña ná caxi tuhun da nuú ñayivi saha yóhó ta já ndaja ndacú da íchí
nuú yahún.

³Ta cahán cóhó da tañu yucú íchí ta cachi da já xihín ñayivi:

“Caja tiaha ndó íchí nuú quixi xitoho í ta cuná ndó in íchí ndacú
nu mé á ña ná ndihvi a ínima ndó”, nacahyí Isaías.

⁴Ta ndaja coo íin Juan yucú íchí ta nacasáhá cája ndúta dá ñayivi. Ta caxi tuhun da xihín ná ña tá cúní na caja cáhnu ini Ndióxi sahá cuachi na já ndítahan nu ná ndicó coo ini na ta já candúta ná. ⁵Chí naquixi cuahá ndivaha ñayivi estado Judea xihín ñuu Jerusalén taa johó na nu cáhan da ta tá náhma na cuachi na já nacaja ndúta dá na ini yuta Jordán.

⁶Ta nasandixi mé Juan yóho jáhma ña nacavaha na xihín íji camello ta nasandico in níi jáhndá tóco dá. Ta naxixi da tica xihín ñuñu yucú. ⁷Tá caxi tuhun da nuú ñayivi já cáchí da já:

—Jatá yehe vaxi in da íin cuaha chága ndée dá a juú ga yehe chí coó sahá i ndica xítí i nu dá ña ndaxí i correa ndusa dá. ⁸Yehe najácandúta i ndohó xihín ticuíf joo mé da cán cúu da jándicutú ínima ndó xihín ínima yíi Ndióxi —nacachi Juan xihín ná.

Tá nacandúta Jesús

(Mt. 3:13-17; Lc. 3:21-22)

⁹Mé tiempo já naquee Jesús ñuu Nazaret ña ndácaan estado Galilea. Naxinu a nu íin Juan ta najácandúta Juan Jesús ini yuta Jordán cán. ¹⁰Ta tá naquee Jesús ticuíf cán já naxini a nandinuna indiví ta nanuu ínima yíi

Ndióxi jata mé á. Ta cáa ínima yii Ndióxi yóho tá quiahva cáa in ndijata.

¹¹Ta naxini johu na cáhan in a indivi ta já cáchí a já:

—Yóhó cúun jahyi máni i ta cájii ndivaha ini i xuhun.

Tá naxito ndojó tiñáhá sacuahá Jesús

(Mt. 4:1-11; Lc. 4:1-13)

¹²Ivi laá nasahan ínima yii Ndióxi ndáca Jesús yucú íchí nu cóo ñayivi.

¹³Ta cán nasahiin a ivi jico quivi ta mé tiñáhá sacuahá naxito ndojó rí a.

Ta cán ndúu quití quini joo naxinu java táto Ndióxi chindeé na mé á.

Cásáhá Jesús cáhan tuhun vaha xihín ñayivi

(Mt. 4:12-17; Lc. 4:14-15)

¹⁴Tá nandihí nachicaan na Juan vecaa já nasahan Jesús estado Galilea caxi tuhun a nuú ñayivi tuhun vaha saha Ndióxi. ¹⁵Já cáchí a já xihín ná:

—Sa naxinu tiempo viti ta nacayati quivi cacomí Ndióxi cuéntá sahá ñayivi. Ña ndítahan nu ndo quéa jándacoo ndó cuachi cája ndó ta candúsa ndó tuhun vaha ña cuu jácacu ndohó —nacachi Jesús.

Cána Jesús comí na caca tuun xihín á

(Mt. 4:18-22; Lc.: 5:1-11)

¹⁶In tañu xíca Jesús cuahan yati yuhú tañuhú Galilea. Ta naxini a in da naní Simón xihín Andrés, da cúu ñani. Ndíví mé da yóho cúu dá da tává tiyacá ta núhu da jácana da núnu dá ini tañuhú. ¹⁷Nacasáhá cáchí Jesús já xihín dá:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

¹⁸Ta chí ivi laá najándacoo da núnu dá ta nandico da Jesús.

¹⁹Anda já naxica loho ga Jesús chí nuu já naxini a Jacobo xihín ñani da Juan, da cúu jahyi Zebedeo. Ndíví da yóho núhu da ini barco ndája vaha da núnu dá. ²⁰Nacana Jesús ndíví da yóho ta chí najándacoo da tátá da, Zebedeo cán ini barco xihín java ga da cája chúun xihín dá ta já nacasáhá xíca tuun da xihín Jesús.

Tá ndácaan ínima quini ini in dataa

(Lc. 4:31-37)

²¹Naxinu cóo Jesús xihín na xíca tuun xihín á nuu Capernaum. Ta tá natandaa quivi ndíquehe ndée ñayivi já naquihvi Jesús ini veñuhu ta nacasáhá jánahá na cán. ²²Ta nacatontó tóco ndihi ñayivi sahá tuhun cáhan mé á jáchí najánahá mé á tátuhun in da iin saha cahnda chuun ta có

cáhan tátuhun na jánaha ley Moisés. ²³Ini mé veñuhu cán nasandacaan in dataa, da ndacaan ínima quini ini. Nacasáhá cáyuhú rí cán já cáchí rí já:

²⁴—Jesús, da ñuu Nazaret. Ndá cuéntá quéa quíhvi nuún xihín nde. Á vasún jándihún sahá nde. Sa xíní vaha i yohó ta cándaá cáxí ini i ña cúun in da yíi nachindahá Ndióxi —nacachi rí cán.

²⁵Ta nacasáhá Jesús jánani a rí quini ndacaan ini da cán. Já nacachi a já:

—Caji yúhun ta janí da yóho.

²⁶Ta tá quéta rí quini ndacaan ini da cán nasahní yíhí rí da ta cáyuhú cóhó rí já naqueta rí ini da cán. ²⁷Nacatóntó tóco ndihi ñayivi chí nacasáhá ndaca tuhún táhan na já cáchí na já:

—Ndía quéa yóho. Ta ndá naquixi tuhun saá jánaha da yóho jáchí cáhan da xihín rí quini tátuhun in da sáhdá chuun ta chí cándúsa rí quee rí cuhun rí —nacachi na.

²⁸Ta chí cama chá nandicuítá nuu tuhun saha Jesús níí cúú estado Galilea.

Ta nandaja vaha Jesús ñá cúú xojo Simón

(Mt. 8:14-15; Lc. 4:38-39)

²⁹Tá naquee na veñuhu já cuahan Jesús xihín Jacobo xihín Juan vehe Simón xihín ñani da, Andrés. ³⁰Ta ndaja coo cándúhu ñá cúú xojo Simón nuú xito nachicaan cáhni ndeé ña. Ta tá naxinu coo na cán já nacaxi tuhun na nuú Jesús ña quíhvi ña. ³¹Anda já nacayati Jesús nu ña ta natiin a ndáha ña já nandínehe a ña chí ivi laá nandindaa cáhni á ña. Anda já nacasáhá cája ndíví ña ña cuxu na.

Ndája vaha Jesús cuahá ñayivi

(Mt. 8:16-17; Lc. 4:40-41)

³²Tá naqueta nuu candii ta nacuaá já néhe ndihi ñayivi na quíhvi xihín na ñúhu ínima quini ini nacasa na nu Jesús. ³³Ta tóco ndihi na ñuu nandai cuu na yuyéhe nu íin Jesús. ³⁴Nandaja vaha Jesús cuahá ñayivi, na ndóho tá nuú cuehe. Ta natavá a cuahá ínima quini ini ñayivi. Joo coo nasahan Jesús ñamaní nu rí quini ña ná cahan rí jáchí xíní rí yo cúú Jesús.

Xíca nuu Jesús jánaha ñayivi estado Galilea

(Lc. 4:42-44)

³⁵Ta naha inga quiví itaan tá cámaní yíi tiví nandacoo Jesús ta naquee a ñuu cuahan nuú coo ñayivi ña caca tahví a nu Ndióxi. ³⁶Tá nandacoo Simón xihín java ga da xíca tuun xihín Jesús já naxini na ña coo a íin chí

naquee na cuahān nā ndinducú nā mé á. ³⁷Ta tá nandinehe ñahá nā já cáchí nā já xihīn á:

—Tóco ndihi ñayivi ndinducú nā ndohó.

³⁸Joo cáchí Jesús já xihīn ná:

—Cóho java ga ñuu yati yóho ñā ná jánaha i tūhun vaha nuú nā cán viti jáchi sahá ñā yóho vaxi i —cáchí Jesús.

³⁹Ta chí naxica nuu Jesús níí cúú estado Galilea cáhan tūhun vaha ini veñuhu in in ñuu cán ta tává a ínima quini ndácaan ini ñayivi.

Tá nandaja vaha Jesús in da ndóho cuehe táhyi

(Mt. 8:1-4; Lc. 5:12-16)

⁴⁰Ta ndaja coo nacayati in dataa ndóho cuehe táhyi nuú Jesús ta nacaxítí da nū á já nacasáhá cáchí da já:

—Cuu ndaja vaha ndó yehe tá cúni ndó —cáchí da.

⁴¹Ta natahvi ini Jesús saha dá. Anda já nacani ndaa ndáha á da. Já cáchí a já:

—Cúni ñā ná ndivahún ñā cán quea nandivahún viti —nacachi Jesús xihīn dá.

⁴²Tá nacachi a já chí ivi laá nandindaa cuehe táhyi ñā nandoho da cán. Já nandivií yiquí cuñu da. ⁴³Tá nandihī najándindayí Jesús da ta nasahnda chuun nū dá já cáchí a já xihīn dá:

⁴⁴—Candehé. A cáhun xihīn ni in túhún toho ñayivi ñā nacaja i xuhun. Cuáhán ndacún nahun mún nuú jutū. Ta ndítahan jocún ñaha nū Ndióxi tátuhun nasahnda ley Moisés sanahá caja nā sa nandivaha. Já ná candaa ini tóco ndihi ñayivi ñā sa nandindaa va cuehe nasandohún —nacachi Jesús xihīn dá.

⁴⁵Joo tá naquee da cuahān da nacasáhá da ndícani da nuú ndihi ñayivi ñā nandaja vaha Jesús da sahá ñā cán quea coo nacuu ga ndihvi tívi Jesús ni in ñuu. Jatá ñuu nuú co ndúu ñayivi nasahīn a ta janda mé cán xínu coo ñayivi, nā quíxi nuú ndijáá ñuu xító nihni na mé á.

Tá nandaja vaha Jesús in da naxihī tuchu saha

(Mt. 9:1-8; Lc. 5:17-26)

2 Tánayaha chá quivi já nandicó coo tucu Jesús ñuu Capernaum. Ta nacandaa ini ñayivi ñā íin a vehe. ²Ta chí cama chá nanditútú cuahá ñayivi chí co vati ga yuyéhé cándita na. Já nacasáhá cáxi tūhun Jesús tūhun Ndióxi nū ná. ³Anda já naxinu coo comí taa ta ñéhe da in da naxihī tuchu saha. Nasaa da nū íin Jesús. ⁴Joo naxini da ñā a cuú xinu da yati nū íin Jesús sahá cuahá ñayivi chutú ndaa nū íin a cán. Chí nandaa da jini véhe ta nacasáhá da súná da jini véhe mé xoo nū íin Jesús. Ta mé cán

najánuu da xito loho nu cándúhu da quíhvi chí yávi jini véhe cán. ⁵Tá naxini Jesús ña cándeé ini da cán mé á já cáchí a já xihín mé da quíhvi cán:

—Candehé, jahyi a. Sa nacaja cáhnu ini i sahá cuachún viti —nacachi Jesús.

⁶Joo java na jánaha ley Moisés ndúu coo cán nacasáhá cáhán na: ⁷“Ndá cuéntá quéa ndája núu da Ndióxi xihín tühun cáhan da. Jáchí ni in túhún toho ñayivi a cuú caja cáhnu ini sahá cuachi. In túhún jini Ndióxi quéa cuu caja cáhnu ini sahá cuachi”, nacaán na. ⁸Joo sa nacandaa ini Jesús ña cáhvi ini na cán chí nacachi a já xihín ná:

—Ndávaha cáhán ndo já. ⁹Á cáhán ndó ña ihvi chága cachi i xihín da yóho: “Nacaja cáhnu ini i sahá cuachún viti.” Á tá coó ta cachi i xihín dá: “Cuándacoo, ndiquehe xitún ta caca nuún.” ¹⁰Candehé vaha ndó ná naha i nu ndo ña íin sahá i, da nachindahá Ndióxi nduu u ñayivi caja cáhnu ini i sahá cuachi cája ñayivi ñuyívi yóho —nacachi Jesús xihín ná.

Anda já nacachi a xihín mé da naxihí tuchu sahá cán:

¹¹—Ta viti cáhan i xuhun cuándacoo ndiquehe xito lohún ta cuanúhu —nacachi a.

¹²Chí ivi laá nandacoo mé da quíhvi cán ta nandiquehe da xito loho da já naquee da cuahan da nuú ndihi na ndúu cán. Anda já nacatontó tóco ndihi na ta nacasáhá cája cáhnu na Ndióxi já cáchí na já:

—Ni in túhún tañu coó naxini nde in ñaha cáhnu tátuhun ña yóho —nacachi na.

Tá nacana Jesús Leví, da cáhan na Mateo xihín

(Mt. 9:9-13; Lc. 5:27-32)

¹³Tá nandihí já nasahan tucu Jesús yuhú tañuhú cán ta tá nacayati cuahá ñayivi nu á já nacasáhá jánaha nu ná. ¹⁴Nani xíca Jesús cuahan nayaha nu íin in da naní Leví, jahyi Alfeo. Ta íin coo da nu sácoo da játaca jihún cuéntá impuesto. Ta cáchí a já xihín dá:

—Naha quíi candicun yehe.

Anda já nandaca ndichi Leví ta nandico da Jesús.

¹⁵Tá nandihí nasahan Jesús vehe Leví ta nasacoo a xíxi a xihín cuahá da játaca jihún cuéntá impuesto xihín java ga na cája cuachi. Ta sa mé cán nasanduu ri java da xíca tuun xihín Jesús xíxi da tañu na cán jáchí cuahá ñayivi ndíco na Jesús. ¹⁶Joo na jánaha ley Moisés xihín na fariseo tá naxini na íin coo Jesús xíxi a xihín na cán nacasáhá cáchí na já xihín da xíca tuun xihín Jesús:

—Ndá cuéntá quéa xíxi xitoho ndó xihín na játaca jihún cuéntá impuesto ta xihín java ga na cája cuachi —nacachi na cán.

¹⁷Tá naxini johō Jesús ña yóho ñacasáhá cáchí a já:

—Ñayivi íin vaha cō xíní ñúhú toho na dā cája tátá ñahá joo nā quíhvi, nā cán cúú nā xíní ñúhú dā cája tátá ñahá. Ta yehe coó vaxi toho i cana i nā sá íin vaha. Vaxi i cana i ñayivi, nā cája cuachi ña ná jándacoo na cuachi cája na —ñacachi Jesús.

Cáhan Jesús ndá saha quéa cajuhun na

(Mt. 9:14-17; Lc. 5:33-39)

¹⁸In tañu tá xíjuhun nā xíca xihín Juan xihín nā xíca xihín nā fariseo naxinu cōo java ñayivi nū Jesús ta ñacasáhá ndáca tühún nā mé á já cáchí nā já:

—Ndávaha cō xíjuhun toho nā xíca tuun xihín yóhó joo xíjuhun mé nde, nā xíca xihín Juan xihín nā xíca xihín nā fariseo —ñacachi na.

¹⁹Ta nanducú ñehe Jesús tühun nū ná já ñacachi a já:

—Á cáhan ndo xíjuhun nā ndúu vícō tándaha nani íin mé dā tándaha cán xihín ná. Uhun. Jáchí cájií íní nā nani íin mé dā tándaha xihín ná. Chí a cuú toho cajuhun na. ²⁰Joo xinu quiví candaa na mé dā tándaha ta anda jáví casáhá cajuhun na. Ta cáchí i xihín ndó ña vaxi quiví candaa na yehe nuú nā yóho ta anda jáví casáhá nā xíca tuun xihín i cajuhun na —ñacachi Jesús.

²¹Ta nasacu Jesús inga quiahva nū ná já cáchí a já:

—Ama ná jándaha ñayivi jahmá yatá xihín in tühun jáhma saá jáchí tá nandihí ndíndíí a, sáhndá chága ví a jahmá yatá cán ta jándacáhnú chága ví a yávi ña nandicahmá nā cán. ²²Ta ni cō táan nā vino saá ini vóso níí yatá jáchí jácáhndí mé vino cán níí ta cuíta mé vino cán ta tíví vóso níí caja dó sahá ña cán quéa ndítahan taán nā vino saá ini vóso níí saá —ñacachi a.

Ña ñacaja nā xíca tuun xihín Jesús in quiví ndíquehe ndée ñayivi

(Mt. 12:1-8; Lc. 6:1-5)

²³In quiví ndíquehe ndée ñayivi nani xíca Jesús cuahan tañu nuú naxutu na trigo xihín nā xíca tuun xihín á já ñacasáhá tühun na yucu jini trigo.

²⁴Tá naxini nā fariseo ña cája na já ñacachi na já xihín Jesús:

—Candehé. Ndávaha cája nā xíca tuun xuhun chuun ña cō ndítahan caja na quiví ndíquehe ndée yō —ñacachi nā fariseo.

²⁵Anda já ñacachi Jesús já xihín ná:

—Á a ñáha cahvi ndó nuú tühun Ndióxi nū cáhan sahá ña ñacaja David sanahá tá ñacuico mé dá xihín nā xíca xihín dá. ²⁶Ña ñacaja David quéa ñaquíhvi da veñuhu Ndióxi tá nasacuu Abiatar dā sacuahā nuú jutū. Já naxixi da pan yíí ña in tühún jutū cúú dā ndítahan nuú cuxu ña cán, nduu. Joo naxixi David ña ta nasahan dā ña nuú java ga nā xíca xihín dá.

27Ta ñacachi tucu Jesús já xihín ná:

—Candehé ndo. Coó ñacavaha Ndióxi ñayivi ndoho ini na sahá quivi ndíquehe ndée ná jáchi ñasacu ini a cavaha in quivi já ná cuu ndíquehe ndée ñayivi. 28Ñā cán quēa yēhe va, dā ñachindahá Ndióxi nduu ñayivi íin sahá i cahnda i chuun sahá quivi ndíquehe ndée ñayivi —ñacachi Jesús.

Tá ñandaja vaha Jesús in dā ñahichi ndáha

(Mt. 12:9-14; Lc. 6:6-11)

3 Naquihvi tucu Jesús ini veñuhu ta cán ñasandacaan in dataa, dā ñahichi ndáha. 2Ta ñacasáhá nání ña fariseo Jesús sándehe ña á ndaja vaha mé á dā cán quivi ndíquehe ndée ná já ná cuu chicaan ña cuachi jatá. 3Anda já cáchí Jesús xihín dā ñahichi ndáha cán já:

—Cuándacoo ta candichi mahñú yóho —ñacachi Jesús.

4Anda já ñandaca tuhún a ña java cán já cáchí a já xihín ná:

—Ndía cáchí ley ndítahan caja í mé quivi ndíquehe ndée ñayivi. Á chindeé yó ñayivi á caja í ña núu xihín ná. Á jácacú ña á cahní yó ña —ñacachi Jesús.

Joo ni in túhún tuhun coó ñacahan ña. 5Ñacasáhá xójo ini Jesús sándehe a nu ná. Joo táhvi tucu ini a sahá ná jáchi cúú ná ñayivi sáá ini. Ta cáchí a xihín mé dataa, dā ñahichi ndáha cán:

—Jándacaa ndáhun.

Tá ñajándacaa dā ndáha dá ivi láá ñandivaha ndáha dá. 6Tá ñandihi ñaquee ña fariseo veñuhu já ñacasáhá ña jándique táhan na tuhun na xihín ña cuéntá Herodes ña cahní ña Jesús.

Tá ñanditútú cuahá ñayivi yuhú tañuhú

7Joo ñasahan Jesús xihín ña xíca tuun xihín á yuhú tañuhú ta cuahá ndivaha ñayivi estado Galilea ñandico ña ñasahan ña. 8Tá ñacandaa ini ñayivi ña náhnu cája Jesús, ñaquixi cuahá ña estado Judea xihín ña ñuu Jerusalén xihín ña ñundáhyi Idumea xihín ña inga xoo yuta Jordán xihín java ña ndúu ñuu válí jíin ñuu Tiro xihín Sidón jáchi candehé ña Jesús cúni ña. 9Sahá ña yóho quēa ñaxica Jesús ñamaní nuú ña xíca tuun xihín á ña ná cacu tiaha na in barco nuú ndacaan mé á ña ná a cándíhi ñayivi cuahá cán ña. 10Jáchí cuahá ndivaha ñayivi ñandaja vaha mé á. Sahá ña cán quēa tóco ndihi ña quíhvi cáti na jatá ña caní ndaa ndáha ná mé á cúni ña.

11Ta tá ñaxini ña ñúhu ínimā quini ini cán Jesús ivi láá ndícava xítí ña nu á ta cásáhá cáyuhú cóhó ña já cáchí rí quini ndácaan ini ña cán já:

—Yóhó cúun dā cúú in túhún jíni já jahyi Ndióxi.

12Joo jánani Jesús rí cán já sáhndá a chuun nu rí ña ná a cáxi tuhun rí yo cúú mé á.

Tá naçaxi Jesús uxu ivi da caca tuun xihin á*(Mt. 10:1-4; Lc. 6:12-16)*

¹³Tá nandihí já naquee xóo Jesús nasahan in xiqui ta tá nandihí nacana mé á java na xíca xihín á cán, mé na cúní a caxi a ta naxinu na cán nu Jesús. ¹⁴Ta tañu na cán nandicaxi Jesús uxu ivi da caca tuun xihín á ta tá nandihí já nachindahá mé á da cuhun da cahán da tuhun Ndióxi xihín ñayivi. ¹⁵Ta nacaja mé á ña cuu ndaja vaha da na quíhvi ta cuu cahnda da chuun nu rí quini ña ná quee rí ini ñayivi. ¹⁶Ña yóho cúu quiví uxu ivi da nandicaxi Jesús caca tuun xihín á: Simón, da nasacu tucu a quiví cananí Pedro ¹⁷xihín Jacobo xihín ñani da, da naní Juan, jahyi Zebedeo. Ndívi da yóho nasacu a quiví cananí Boanerges ta mé tuhun yóho cúní cachi a cúu dá tátuhun jahyi in tasa ña cána indiví. ¹⁸Nacaxi a Andrés xihín Felipe xihín Bartolomé xihín Mateo xihín Tomás xihín Jacobo, da cúu jahyi Alfeo xihín Tadeo xihín Simón, da naxica cuéntá na cananista ¹⁹xihín Judas Iscariote, mé da najicó túhún Jesús tá nu ndíhí.

Jáchojo na cuachi jatá Jesús ña cája chúun a xihín ndée tiñáhá sacuahá*(Mt. 12:22-32; Lc. 11:14-23; 12:10)*

Anda já naquihvi Jesús ini in vehe xihín na xíca tuun xihín á. ²⁰Ta inga tucu nachutú cuahá ñayivi nu íin a janda a cuú cuxu a xihín na xíca tuun xihín á cán. ²¹Ta tá nañehé na vehe Jesús tuhun sahá ña yóho ivi laá naquixi na ña cañehe na mé á cuhun a cúní na jáchi nacatachi Jesús cáhán na.

²²Jári na jánaha ley Moisés, na naquixi Jerusalén nacasáhá cáhán na já cáchí na já:

—Taa yóho ndácaan Beelzebú ini da, rí cúu sacuahá nu rí quini. Ta xihín ndée mé rí cán tává da rí quini ini ñayivi —nacachi na.

²³Anda já nacana Jesús ñayivi já nasacu a in quiahva nu ná ja cáchí a já xihín ná:

—A cuú tavá tiñáhá sacuahá mé rí. ²⁴Jáchi tá sáhndá java táhan na ndúu in ñuu ta cáni táhan ndaja táhan mé va na já quéa a ñéhe íní na coo nahá na. ²⁵Ta tá cásáhá sáhndá java táhan na ndúu in vehe ta cáni táhan na já a cuú ga canduu nahá na mé vehe cán. ²⁶Ta quiahva já tá ná casáhá rí quini ndúu ndáha tiñáhá sacuahá cáni táhan rí xihín mé va rí janda quiahva sáhndá java táhan rí já quéa a cuú canduu nahá rí jáchi ndihí saha rí.

²⁷Sácú u inga quiahva nu ndo. Ni in dataa a cuú ndihvi da caja cuíhná da ñaha vehe in da ndacú cán joo tá ná cató da da ndacú já cuu quehe da ñaha da cán.

28 Mé a ndaa ná cahan i xihín ndo. Ndióxi cuu caja cáhnu ini a saha tá nuú cuachi cája ñayivi xihín saha tá nuú tuhun quini cahan na. 29 Joo tá ná cahan núu na saha ínimá yíi Ndióxi já quéa a cája cáhnu ini Ndióxi sahá ña nacaja na ta anda ama cáa quívi candojo na cuachi sahá —nacachi Jesús.

30 Nacachi a ña yóho xihín na cán jáchi cáchí na ña ndácaan ínimá quini ini a.

Náná Jesús xihín ñani a cúní na cuni na a

(Mt. 12:46-50; Lc. 8:19-21)

31 Tá nandihí naxinu náná Jesús xihín ñani a nu íin a joo nacandoo na jata véhe. Ta nachindahá na in na nasahan nacana ñahá. 32 Ta na ndúu coo xihín Jesús cáchí na já xihín á:

—Jata véhe cáa íin nánún xihín ñanún ta ndínducú na yohó —cáchí na xihín Jesús.

33 Anda já nacachi Jesús já xihín ná:

—Ná cahan i xihín ndo yo já cúu tátuhun náná i xihín ñani i.

34 Anda já nasandehé a nuú na ndúu coo tiyivi xihín á cán já cáchí a já xihín ná:

—Na yóho cúu ná tátuhun náná i xihín ñani i. 35 Jáchi ndá na cája ña cúní Ndióxi, na cán cúu ná tátuhun ñani i xihín quiahvá i xihín náná i —nacachi Jesús.

Sácú Jesús quiahva sahá in da sátá tata

(Mt. 13:1-9; Lc. 8:4-8)

4 Nacasáhá tucu Jesús jánañá ñayivi yuhú tañuhú ta nataca cuahá ñayivi nu íin a cán. A juú quiahva cuahá cúu ná sahá ña cán quéa naquihvi Jesús ini in barco, dó cándichi yuhú tañuhú cán. Ta nasacoo a cán ta tóco ndihí ñayivi nandaca ndita na nuú ñutí yuhú tañuhú cán. 2 Já najánañá cuahá ñaha nuú na cán ta nasacu a quiahva nu ná já cáchí a já:

3 —Cuni johó ndó ña yóho: In da sátá tata naquee da cuahan da cata da ña. 4 Ta tá sátá da ña cuahan da nacuyu java ña íchi ta naxinu laa ta nasaxí rí a. 5 Ta java ña nacuyu a tañu yuu nuú coó cuahá ñúhu. Ta cama chá nanduta mé tata cán jáchi co cúná ñúhu nuú nacuyu a. 6 Joo tá naqueta candii já najáhichi a ña sahá ña coó cuahá yóho a chí nandihí sahá. 7 Ta java tata nacuyu a tañu tohínú ta tá nasahnu tohínú cán já nanditáñá ndihí a nacaja tohínú chí coó nasahan mé tata cán ndá ñaha jáquee na nu á. 8 Ta java tata nacuyu a nuú ñuhú vaha. Nanduta mé tata cán ta nasahnu a já nasahan cuahá ñaha ña jáquee na nu á. Java ña nasahan oco uxu a nuú in in tata ta java ña nasahan uni jico uxu a ta java ña in ciento a nuú in in tata.

⁹Anda já nacachi tucu Jesús já xihín ná:
—Na íin johó, ná cuni johó na —nacachi a.

Ndícani Jesús ndá saha quéa nasacu a quiahva nu ná

(Mt. 13:10-17; Lc. 8:9-10)

¹⁰Tá nacandoo Jesús xihín mé na uxu ivi xica tuun xihín á cán xihín java ga na ndíco ñahá cán já nacasáhá ndáca tuhún na Jesús ña ndía cúní cachi a xihín quiahva nasacu a nuú na cán. ¹¹Ta cáchí a já xihín ná:

—Ña coó nacandaa ini ndó jihna ña cán cándaa ini ndó a viti jáchi nasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúu na sácú u quiahva nuu. ¹²Já quéa vatí sándehé na joo cúu ná tátuhun na co tívi nuu ta vatí xíní johó na joo cúu ná tátuhun na jóho jáchi co cándaa ini na ña cáhan i xihín ná. Ta sahá ña cán quéa co ndíco coo na nu Ndióxi ta ni mé á co cája cáhnu ini sahá cuachi na.

Ndícani Jesús sahá da sátá tata cán

(Mt. 13:18-23; Lc. 8:11-15)

¹³Ta já cáchí tucu a já xihín na xica tuun xihín á:

—Ta tá co cándaa ini ndó quiahva, ña nasacu u yóho ndaja caja ndó cándaa ini ndó java ga quiahva ña cachi i xihín ndo. ¹⁴Mé da sátá tata cán cúu dá tátuhun da xica cáhan tuhun Ndióxi xihín ñayivi. ¹⁵Java ga ñayivi cúu ná tátuhun tata ña nacuyu íchi. Taa johó na tuhun Ndióxi ta tá nandihí naxini johó na ña já vaxi tiñahá sacuahá ta cája rí xihín ná ña ndíndójó na ña. ¹⁶Ta java ñayivi cúu ná tátuhun tata ña nacuyu tañu yuu jáchi taa johó na tuhun Ndióxi ta cájii ini na ndíquehe na ña. ¹⁷Ta tá quiahva ndiává yucu sahá ña co ñúhu cúná yóho a quiahva já ndóho ñayivi tá casáhá ndicuíta ñayivi cája xíxi na xihín ná. Ta tá casáhá ndóho ini na sahá tuhun Ndióxi ña naxini johó na cán chí ivi laá jándacoo va na ña cándeé ini na Ndióxi. ¹⁸Ta java na cúu ná tátuhun tata ña nacuyu tañu tohíñú jáchi taa johó na tuhun Ndióxi ¹⁹joo ndícani ndivaha ini na sahá ñaha ñuyíví yóho. Cátóo ndivaha na ñaha cuíca chí jándahvi na mé ná xihín ña cán ta xíca ini na coo tóco ndihí ñaha nu ná. Ta cáva nuu táhan ñaha ñuyíví yóho xihín tuhun Ndióxi ini ínimá ná sahá ña cán quéa cávitá ini na ta co sáhnu na xihín tuhun Ndióxi. ²⁰Joo ndúu java na xíní johó tuhun Ndióxi ta cándúsa na ña. Ta cája chúun vaha na xihín á ta já cuahnu na xihín á. Cúu ná tátuhun tata nacuyu nu ñuhú vaha. Java na cúu ná tátuhun tata ña nasahan oco uxu a nuú in in a. Ta java na cúu ná tátuhun ña nasahan uní jico uxu a ta java na cúu ná tátuhun ña nasahan in ciento a nuú in in tata —nacachi Jesús xihín na cán.

Sácú Jesús quiahva sahá in lámpara

(Lc. 8:16-18)

21Ta cáchí tucu Jesús xihín ná:

—Coó toho chuun lámpara tá chícaan í ña tixi sato á tixi xito jáchi chuun ña quéa cánúu ña nu jícó já ná jándiyehé ña nu yo. 22Ni in túhún toho ñaha a cuú coo jehé jáchi xinú quiví já ndáca náha nu á. Ta ni in tuhun nacahan jehé ñayivi a cuú coo jehé nahá jáchi xinú quiví já candaa ini tóco ndihi ñayivi sahá tuhun nasahin jehé cán. 23Na íin johó, ná cuni johó na —nacachi a.

24Ta cáchí tucu a já xihín ná:

—Candehé vaha ndó ña taa johó ndó. Tá quiahva cája ndó xihín ñayivi quiahva já caja Ndióxi xihín ndó joo chága ví caja mé á xihín ndó. 25Jáchi da sa íin ñaha nuu, ñehé táhvi dá coo chága ñaha nu dá joo da coó ñaha nuu, janda ña chá íin nu dá ndindaa —nacachi Jesús.

Jánaha Jesús nu ná ndá quiahva sáhnú tata

26Ta cáchí tucu Jesús já:

—Tá ndíquiahva ñayivi mé ná ndáha Ndióxi ña ná cacomí a cuénta saha ná já cúu á tátuhun in dataa nachihin tata. 27Tá nandihí yáha quiví ta quíji da ta ndácoo da já yáha quiví xihín ñuú. Ta já ndúta mé tata cán ta sáhnú a joo mé da nachihin a cán co xini da ndaja sáhnú a. 28Sáhnú a jáchi chuun nu mé ñúhu quéa caja ña ná cuahnu ña cán. Jihna ñúhú ndúta mé yucu trigo já cana yóco a ta nu mé yóco a cán ndícutú ndaa ndíqui á. 29Ta tá nachichi mé ndíqui a cán já quée na cuahan na jáquee na ña jáchi naxinu coo quiví jáquee na ña —nacachi Jesús.

Sácú Jesús inga quiahva saha ndíqui mostaza

(Mt. 13:31-32; Lc. 13:18-19)

30Ta cáchí tucu Jesús já:

—Viti sácú u inga quiahva nu ndó já ná cándaa ini ndó ndá quiahva caja Ndióxi xihín ñayivi tá casahá a cómi a cuénta saha ná. 31Cúu á tátuhun in ndíqui mostaza ña chíhin na nuú ñundáhyi. Cúu á ndíqui loho chága nu tóco ndihi ndíqui válí íin ñuyíví. 32Joo tá nandihí nachihin na a nasahnu a ta nanduu a in yító, dó cáhnú nu ndíhi yító. Ta xihín ndahá náhnú dó sácú do cati ta janda laa ndíquehe ndée ri nu cati do —nacachi Jesús.

Sácú Jesús quiahva cuití va nuú ñayivi

(Mt. 13:34-35)

33Najánaha Jesús tuhun Ndióxi nu ná. Ta nasacu cuahá quiahva nu ná tátuhun ña yóho janda quiahva xinú nu mé ná cándaa ini na. 34Xihín mé

quiahva cuití va najánaha Jesús nuú ñayivi joo tá nacandoo Jesús xihín mé na xíca tuun xihín á já ndícani cáxí ndihi a ñaha nuú na cán.

Tá najácatáji Jesús tañuhú tá ndícojo do

(Mt. 8:23-27; Lc. 8:22-25)

³⁵Tá nacuaá mé quiví cán já nacachi Jesús já xihín na xíca tuun xihín á: —Cóho inga xoo tañuhú yóho.

³⁶Anda já najándacoo na ñayivi já naquee na cuahan na xihín Jesús ini mé barco nuú sa ndácaan mé á. Ta ndáca táhan java ga barco cuahan dó xihín ná. ³⁷Ta ndaja coo naxinu in tachi quíni ndivaha. Ta nacasáhá ndícojo tañuhú ndíhvi dó ini barco já nacasáhá ndícutú ticuí ini mé barco cán. ³⁸Ta chí xoo jata mé barco cán cándúhu Jesús quíji a ta cánúu jini á jata ña yíhi jini ná. Já najándacáxí ini na mé á ta cáchí na já xihín á:

—Maestro. Chí co sáhní a mé á ña cúni ndihi saha yo jáchi sácoo barco cahá ticuí cuahan do —nacachi na.

³⁹Anda já nandacoo Jesús ta nacasáhá jánani a tachi xihín tañuhú viti já cáchí a já:

—Catáji ndo.

Já najáyaa tachi. Já nacandoo táji níí mé cán. ⁴⁰Anda já nacachi Jesús xihín na xíca tuun xihín á:

—Ndávaha nayihví nahá ndo. Ndávaha co cándeé ini ndó yehe —nacachi a.

⁴¹A juú quiahva nayihví mé na cán já nacasáhá cahán xihín táhan na:

—Ndá da cúu dataa yóho ña janda tachi xihín tañuhú cándúsa nu cahán da —nacachi na cán.

Tá nandaja vaha Jesús in da ndácaan ínima quini ini

(Mt. 8:28-34; Lc. 8:26-39)

5 Anda já naxinu na inga xoo mé tañuhú cán nu íin ñundáhyi cuénta Gadara. ²Ta tá nanuu Jesús barco cán já naquee in dataa camasanto já naxinu da nuú Jesús. Mé da yóho cúu dá da ndácaan ínima quini ini. ³Ta íin va da nu ndúxu ndii ta ni in na a cúu cató na da ni xihín cadena a cúu cató na da. ⁴Vatí cuahá tañu sa nacató na saha dá xihín ndáha dá joo sáhná da cadena ta jácuachi da ña ta ni in na a cúu caja xihín dá. ⁵Nuú ta ndiví xíca nuu da yúcu xihín nu ndúxu ndii cáyuhú da xíca nuu da ta jándicuehe da mé dá xihín yuu. ⁶Joo tá naxini xíca da Jesús, ñihi chá nasahan da naxinu da nu íin a já nandicava xítí da nu á. ⁷Ta cáyuhú cóhó da já cáchí da já xihín á:

—Ndá cuénta quea vasún quihvi nuún xihín i. Yóhó cúun Jesús, da cúu in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i —nacachi da.

⁸Nacachi da ña yóho xihín Jesús jáchi ñacasáhá sáhndá mé á chuun nu rí quini cán já cáchí a já:

—Ínima quini, janí da yóho.

⁹Anda já ñandaca tühún Jesús mé rí quini cán já cáchí a já:

—Ndaja nanún.

Anda já ñanducú ñehe da cán tühun nu á já nacachi da já xihín á:

—Legión naní nde jáchi cuaha cúu nde.

¹⁰Ndáhví mé xíca tahví da cán nu Jesús ña ná a tává xíca a rí quini cühun rí. ¹¹Ta ndaja coo xíca nuu cuaha cóchí xíxáhan rí yati yúcu cán.

¹²Sahá ña cán quéa ñaxíca tahví mé ínima quini cán nu Jesús já cáchí rí já:

—Chindahá ndehe ná cühun nde ndihvi nde cóchí cáa.

¹³Anda já ñasahan Jesús ñamaní ta chí ñaquee ínima quini ñasañuhu ini da cán já ñandihvi rí ini cóchí xíca nuu cán. Ta tóco ndihi cóchí yóho xínu rí cuahan rí ñanuu rí nu ndáyí já ñajáqueta nuu rí mé rí ini tañuhú chí ñacandaa rí ticuí já ñaxihí rí. Tátuhun ivi mil cóchí ñandihí saha.

¹⁴Ta ndaja coo mé da ndáa cóchí cán ñayihví da chí xínu da cuahan da caxi tühun da ña ñayaha yóho nuú ñayivi ñuu Gadara xihín nuú java ga ña ndúu yati cán. Ñaquee cuahá ñayivi mé cán candehé ña ña ñacuu. ¹⁵Tá ñaxínu coo na nu íin Jesús ñaxini na íin coo da ñasañuhu cuaha rí quini ini cán. Sa ñandaca ndixi da jáhma ta sa ñandicaxí táhyí ini da. Chí ñayihví ña. ¹⁶Ta ña ñaxini ña ñacaja Jesús cán ñacasáhá ña ndícani na nuú ñayivi ña ñandoho dataa, da ñasañuhu rí quini ini cán xihín ña ñandoho cóchí viti. ¹⁷Anda já ñacasáhá ña xíca tahví ña nu Jesús ña ná quee a cühun a.

¹⁸Tá sa cuahan ndihvi Jesús ini mé barco cán já ñaxínu da ñasañuhu rí quini ini cán já ñacasáhá da xíca tahví da nu á ña ná quiahva ñamaní nu dá cühun da xihín á. ¹⁹Joo coo ñasahan Jesús ñamaní nu dá já nacachi a xihín dá:

—Cuanúhu vehún ta ndicani nuú ña vehún ndaja náhnu ñaha ñacaja Ndióxi xuhun ta ndaja ñatahvi ini a sahun —nacachi a.

²⁰Já ñaquee da cuahan da ta ñacasáhá da ndícani da nuú ñayivi ndúu java ñuu cuéntá Decápolis tóco ndihi ña ñacaja Jesús xihín dá. Chí cátóntó ña táa johó na ña.

Tá ñandaja vaha Jesús jahyi jíhí Jairo xihín in ña ñacani ndaa ndáha jáhma á

(Mt. 9:18-26; Lc. 8:40-56)

²¹Tá ñandihí ñandihvi Jesús ini mé barco cán já ñaxínu coo a inga xoo tañuhú nuú ñaquixi a. Ta cán ñanditútú cuahá ñayivi nu á mé yuhú tañuhú cán. ²²Já ñaxínu in da naní Jairo, da sáhndá chuun veñuhu. Tá ñaxini da Jesús ñacaxítí da sahá. ²³Ta ndáhví mé ñaxíca tahví da nu á já cáchí da já:

—Xíhi jahyí i viti ñúhú. Caja ndó ñamaní ná cōhō vehe chinúu ndó ndáha ndó jata ña ná ndivaha ñá já ná catacu ñá —ñacachi da.

²⁴Anda já ñaquee Jesús cuahan xihin dá. Chí cándíhi táhan mé ñayivi ndíco na jata cuahan na. ²⁵Ta tañu ñayivi cán ndácaan in ñá quíhvi. Sa ñaxinu uxu ivi cuia ndítahví nii ña. ²⁶Nandoho ndivaha ini ñá nuú na cája tátá ñayivi ta sa najátiví ndihi ñá jiuhún ña catátá ña cúní ña. Joo a cuú ndivaha ñá ta janda cája ndeé chága ví a xihin ña. ²⁷Tá ñaxini johó ñá saha Jesús já cuahan ñá cayati ñá chí jata tañu tóco ndihi ñayivi cuahan jata mé a cán. Ta ñacani ndaa ndáha ñá jáhma á ²⁸jáchi ñacahán ña: “Tá ná caní ndaa cuití ndahá yo jáhma á já ndavaha í”, ñacahán ña. ²⁹Ivi laá nahichí nii ñá. Ñaxini cáxí ña ñandivaha ñá ta cuahan va cuehe ñandoho ñá. ³⁰Jári Jesús ivi laá ñacandaa ini a ña ñandivaha in ñayivi ñacaja ndée mé á. Já ñacasáhá sándehe a chí jata tañu ñayivi. Já ñacasáhá ndáca tühún á na já cáchí a já:

—Ndá ndó ñacani ndaa ndáha jahmá i.

³¹Ta ñanducú ñehe mé na xíca tuun xihin á cán tühun nu á já cáchí na já xihin á:

—Sándehe vaha mé ndó ndá quiahva cándíhi táhan ñayivi vaxi na xihin ndo ta cáa ga mé ndó ndáca tühún ndó ndá na ñacani ndaa ndáha jáhma ndo —ñacachi na.

³²Joo cáva nuu nuu Jesús sándehe a ndá na ñacani ndaa ndáha jáhma á. ³³Ta mé ñá ñandivaha cán tá ñacandaa ini ñá ña ñayaha já ñacasáhá quíji ninu ñá sahá ña yíhvi ña. Já ñaxinu ñá ñasaxítí ña nu Jesús. Anda já ñacasáhá ña ndícani ñá nu á ndaja cáa ña ñacaja ñá. ³⁴Anda já ñacachi Jesús já xihin ña:

—Jahyi a, ñandivahún jáchi ñacandúsún yehe. Cuanúhu ta a ndícani ga inún jáchi ñandindaa cuehun —ñacachi Jesús.

³⁵Cáhan yii va Jesús xihin ñá cán tá ñaxinu java na ñaquixi vehe mé da sáhdá chuun veñuhu cán já ñacachi na já xihin dá:

—Sa ñaxíhi va jahyi ndó. A jáquihvi ga ndó da xíca jána ñayivi jan —ñacachi na.

³⁶Joo ñacaja Jesús tátuhun co xíní johó a nuú ñacahan na. Ñacasáhá cáchí a já xihín da sáhdá chuun veñuhu cán:

—A cáyihvi tohún. Candúsa cuití vún yehe —cáchí a.

³⁷Ta coó ñasahan Jesús ñamaní nuú na cuaha ndúu cán cuhun na xihin á. Na ñasahan cuití xihin á cúú Pedro xihin Jacobo xihin Juan, da cúú ñani Jacobo. ³⁸Tá ñaxinu na vehe mé da sáhdá chuun veñuhu cán já ñaxini a ndíváa ñayivi sácu ndivaha na cáyuhú na ndúu na cán. ³⁹Já ñaquihvi a vehe ta já cáchí a já:

—Ndávaha ndíváá nahá ndo ta sácu cuahá ndo. Ta coó naxihí toho ñáloho yóho joo quíji cuití va ñá —nacachi a xihín na cán.

⁴⁰Joo nacasáhá na sácu ndaa na a. Anda já natavá Jesús tóco ndihi ñayivi jata véhe. Na naquihvi xihín á nasacuu tátá náná ña xihín na xíca tuun xihín á. Ta nacayati a nu cándúhu mé ñáloho cán. ⁴¹Já natiin a ndáha ña ta nacasáhá cáchí a já xihín ña:

—Talita, cumi —nacachi a. Mé tuhun yóho cúni cachi a: Ñáloho cáhan i xuhun cuándacoo.

⁴²Ivi laá nandacoo ñáloho, ñá ndacaan uxu ivi cuiá ta nacasáhá ña xíca nuu ñá. Já nacatóntó tóco ndihi ñayivi. ⁴³Joo nasahnda Jesús chuun nuú na ndúu cán ña ná a cáxi tuhun na ña nayaha yóho nuú java ga ñayivi. Ta nasahnda a chuun nu ná ña ná quiahva na ña cuxu mé ñáloho cán.

Íin Jesús ñuu a Nazaret

(Mt. 13:53-58; Lc. 4:16-30)

6 Naquee Jesús cuanúhu á ñuu a. Já naquee na xíca tuun xihín á cuahan na xihín á. ²Tá naxinu quivi ndíquehe ndée ná já nacasáhá Jesús jánaha ñayivi ini veñuhu cán. Ta cuahá ñayivi naxini johu nuú nacahan ta chí nacatóntó na ta ndáca tuhún xihín táhan na já cáchí na já:

—Ndájá nacatiahva nahá da yóho ña jánaha dá nu yo. Ndá naquixi ña ndíchí jini dá. Ndá naquixi ñaha xitúhún cája da. ³Á a juú da yóho cúu da cája chúun xihín yító, da cúu jahyi María. Ta ñani da cúu Jacobo xihín José xihín Judas xihín Simón. Ta quiahva da jan ndúu ñuu yóho xihín mí —cáchí na ndáca tuhún táhan na.

Ta chí coó naxeen na candúsa ñahá na. ⁴Sahá ña cán queá nacachi Jesús já xihín ná:

—Vatí tóco ndihi ñayivi cája cáhnu na in profeta joo na vehe da xihín na ñuu da co cándúsa na da —nacachi Jesús.

⁵Chí coó nacuu caja Jesús ña náhnu nuú na cán. Java va na quíhvi cuití va nachinúu a ndahá jini ná já nandaja vaha a na. ⁶Ta chí nacatóntó Jesús sahá ña co cándúsa na mé á. Sahá ña cán queá naquee Jesús cuahan jánaha ñayivi java ga ñuu válí ndúu yati cán.

Tá nachindahá Jesús uxu ivi na xíca tuun xihín á caxi tuhun na nuú ñayivi sahá mé á

(Mt. 10:5-15; Lc. 9:1-6)

⁷Tá najánditaca Jesús ndíhuxu ivi na xíca tuun xihín á cán já nachindahá a na tá ivi tá ivi cañehe táhan na cuhun na. Ta nasahan ndée nu ná ña ná cuu tavá na ínima quini ñúhu ini ñayivi. ⁸Ta nasahnda a chuun nu ná ña ná a cáñehe toho na ñaha cuhun na íchi. In túhún ña cuu

cañehe na cūhun na cúú in garrote, dó tiin ndaa na. Joo a cuú cañehe na ni yátí ni pan ni jiuhún. ⁹Ndítahan cayihi na ndusa ta in túhún cotó na ndítahan candixi na cūhun na. ¹⁰Ta nacachi a já xihin ná:

—Tá ná xinu coo ndó in vehe, canduu ndó mé vehe jan anda quiahva xinu quiví quee ndó cūhun ndo. ¹¹Ta ndá ñuu co cūni na ndiquehe vaha na ndohó ta ni co cūni na taa johó na nu cáhan ndo já quea cuáhán queta ndó cūhun ndo ta catí ndó ña yácá saha ndo já ná naha ña cuahan cuachi na cán jata mé va na. Mé a ndaa ná cahan i xihin ndo ña tá ná xinu quiví caja vií Ndióxi sahá ñayivi ndúu ñuyiví já quea jándoho chága Ndióxi ini ñayivi ñuu jan sahá ña coo nandiquehe na ndohó a juú ga tá quiahva najándoho a ini na ñuu Sodoma xihin Gomorra sanahá —nacachi Jesús xihin ná.

¹²Anda já naquee mé na xica tuun xihin á cuahan na caxi tūhun na nuú ñayivi ña ndítahan nu ná ndicó coo ini na jándacoo na cuachi cája na. ¹³Ta natavá cuaha ná ínima quini nasañuhu ini ñayivi ta tá naxojo na sítí jiní ñayivi quíhvi já nandivaha na.

Tá naxihí Juan, da najaja ndúta ñayivi

(Mt. 14:1-12; Lc. 9:7-9)

¹⁴Nañehe Herodes, mé da cómi cuénta sahá ñayivi cán tūhun sahá Jesús jáchi ní cúú nandicuítu nuu tūhun sahá. Ta já cáchi Herodes já saha Jesús:

—Á a juú Jesús cúú á Juan, da najácandúta ñayivi ta viti nanditacu tucu da. Sahá ña cán quea íin ndée da cája da tóco ndihi ña cája da yóho —cáchi da.

¹⁵Ta java na cáchi na já:

—Á a juú da yóho cúú Elías, da nasacuu profeta.

Ta java na cáchi na já:

—Á a juú da yóho cúú in profeta tátūhun na profeta nasanduu sanahá ndivaha.

¹⁶Tá naxini johó Herodes ña yóho já nacasáhá cáchi da já:

—Jivi ndusa da yóho cúú Juan, da najácandúta ñayivi, da nasahnda i chuun ná chitūhun ná jico dá joo viti nanditacu tucu da —nacachi da.

¹⁷Jáchi mé Herodes yóho sa nasahnda da chuun ña ná tiin na Juan, da najácandúta ñayivi ta nacató na da já nachicaan na da vecaa. Najaja da ña yóho sahá Herodías, ña nasacuu ñájíhí Felipe, ñani mé Herodes jáchi sa naquehe Herodes ña cacuu ña ñájíhí mé dá. ¹⁸Ta natiin Herodes mé Juan jáchi já nasacahan Juan já xihin dá:

—Coo ndítahan coún xihin ñájíhí ñanún —nacachi da.

¹⁹Sahá ña cán quea naxojo ini Herodías xihin Juan. Ta cūni ña cahní ña da joo a cuú caja ná. ²⁰Jáchi yíhvi Herodes Juan sahá ña xini da ña cúú

Juan in taa ndaa, da co cajú cuachi. Ña cán quéa coo nasahan Herodes ñamaní nu mé Herodías cajú ña ña núu xihín dá. Ta taa johó Herodes nu cáhan Juan vatí cáhvi ivi johó ini da sahá ña xini johó da joo cájii ini da taa johó da nu cáhan da. ²¹Joo in quivi nanuna nu Herodías cahní ña Juan jáchi nacaja Herodes in víco cuénta quiví nacacu da. Mé já nacana da da náhnu ndúu nu dá ña ná quixi na cuxu na xihín dá. Ta nacana da tóco ndihi na cúu sacuahá nuú soldado xihín tóco ndihi ñayivi íin saha estado Galilea. ²²Ta ndaja coo ña cúu jahyi jihí Herodías naquihvi ña nu ndúu na xixi na ta nacasáhá ña xíta sahá ña nuú ndihi na cán. Ta nacatóo Herodes xihín na ndúu xixi xihín dá ndá quiahva naxita sahá ña sahá ña cán quéa nacachi Herodes xihín ña:

—Ndía cúní mún, cacún ña nuú i jáchi quiahva i ña nuun —nacachi da.

²³Ta nasahan da tuhun da nu ña cán ña quiahva da tóco ndihi ñaha ná caca ña nu dá vatí ñahñu táhvi ndaa ñundáhyi ña cómí da chuun saha nacachi da quiahva da nu ña. ²⁴Já naquee ña cán cuahan ña caxi tuhún ña nu náná ña ña nacachi Herodes xihín ña. Ta nandaca tuhún ña náná ña ndía caca ña nu dá ta já nacachi mé náná ña já xihín ña:

—Caca yiquí jíní Juan, da jácandúta ñayivi —nacachi Herodías.

²⁵Ta cama chá naquihvi tucu ña cán nu ndácaan Herodes já cáhí ña já xihín dá:

—Viti ñúhú cúní ña ná quiahva mé ndó yiquí jíní Juan, da jácandúta ñayivi nuú i ini in cohó cáhnu —nacachi ña.

²⁶Ta ndaja coo nacasáhá nacacuéha ndivaha ini Herodes sahá ña naxica ña cán yiquí jíní Juan. Joo sahá ña sa nasahan da tuhun da nu ña ta sa naxini johó tóco ndihi na ndúu xixi xihín dá cán ña nacachi da xihín ña sahá ña cán quéa ndúsa cajú da ña cúní ña. ²⁷Chí ivi laá nachindahá da in soldado vecaa ña ná cañehe da yiquí jíní Juan quixi a. ²⁸Naxinu soldado cán vecaa já nachitúhún dá jico Juan já ñehe da ña ini in cohó cáhnu já nandiquiahva da ña nu ña cán já nandiquiahva ña a nu náná ña.

²⁹Tá nacandaa ini na naxica xihín Juan ña nacaja na xihín dá já nasahan na nandiquehe na yiquí cuñu da já najánduxu na da.

Tá nasahan Jesús ña cuxu uhun mil taa

(Mt. 14:13-21; Lc. 9:10-17; Jn. 6:1-14)

³⁰Tá nandihí já nandique táhan tucu na xica tuun xihín Jesús xihín á já nacasáhá ndícani na nu á ña nacaja na xihín ña najánaha na. ³¹Já nacachi Jesús xihín ná:

—Naha ndó ná cohó ndiquehe ndée loho í nu cáa xóo.

Nacachi a já xihín ná jáchi cuahan vaxi ñayivi xica nuu cuaha chá na mé cán ta chí co sahan na ñamaní cuxu na. ³²Anda já nandihvi Jesús xihín na

xíca tuun xihín á ini in barco já naquee na cuahan na in nu cáa xóo. ³³Joo cuahá ñayivi nandicuni na Jesús tá naquee a cuahan. Já xínu cuahá ñayivi tá nuú ñuu cán cuahan sáhá na xoo nuú cuahan Jesús ini barco. Ta jihna ga mé ná naxinu yuhú tañuhú cán a juú ga Jesús. ³⁴Tá nanuu Jesús barco cán já naxini a cuahá ndivaha ñayivi. Já natahvi ini a saha ná jáchi tá quiahva ndúu ndicachi, rí coó xitoho quiahva já ndúu na. Anda já nacasáhá jánaha cuahá ñaha nu ná. ³⁵Ta tá sa cáhini cuahan naxinu na xíca tuun xihín á já cáchi na já:

—Sa nahini va ta a juú xoo nu ndúu ñayivi quéa yóho. ³⁶Ndindayí ndó ñayivi ná cuhun na ñuu válí xihín nuú yati yóho já ná cueen na ña cuxu na —nacachi na xíca tuun xihín Jesús.

³⁷Tá nandihi já nanducú ñehe Jesús tuhun já cáchi a já:

—Mé ndó quiahva ndó ná cuxu na —nacachi Jesús xihín na cán.

Ta nacachi na já xihín á:

—Ndá cuu caja nde quiahva nde ña cuxu na yóho jáchi jiuhún cuahá ndivaha xíní ñuhú nde já cuu cueen nde pan cuxu ñayivi cuaha yóho. Ta ni a quéta toho ivi ciento denario —nacachi na.

³⁸Já nacachi tucu Jesús já xihín na cán:

—Ndaja pan cómí ndo. Cuahán ndo candehe ndo.

Tá nasahan na sándehe na já cáchi na já xihín á:

—Íin uhun pan xihín ivi tiyacá.

³⁹Anda já nasahnda Jesús chuun nu ná ña ná jácacoo na ndihi ñayivi tá táhndá nuú yucu cuí cán. ⁴⁰Ta nasacoo na java táhndá in ciento na ta java táhndá ivi jico uxu na. ⁴¹Anda já natiin Jesús ndíhuhun pan xihín ndíví tiyacá ta sándehe a indiví já nandiquiahva ndixahvi nu Ndióxi. Ta nasahnda java pan já nasahan ña nuú na xíca tuun xihín á já ná ndicahnda na ña nuú ñayivi. Tá quiahva já nasahnda tiyacá já nanditahnda rí nu tóco ndihi ñayivi cán. ⁴²Já naxixi tóco ndihi ñayivi cán ta nachutú tixi ndihi na. ⁴³Ta mé pan xihín tiyacá ña nacandoo naxixi na najáchutú na uxu ivi toycá. ⁴⁴Ta naxixi uhun mil dataa cán.

Tá naxica sáhá Jesús nuú tañuhú

(Mt. 14:22-27; Jn. 6:16-21)

⁴⁵Tá nandihi nacaja Jesús ña ná ndihvi na xíca tuun xihín á ini in barco ña ná cuhun cuéé na inga xoo tañuhú já xinu na Betsaida nani ndíndayí a ñayivi já saa mé á cán ndique táhan xihín ná. ⁴⁶Ta tá sa nandindayí ndihi a ñayivi naquee a cuahan yucu caca tahví a nu Ndióxi. ⁴⁷Tá nacuaá sa ndácaan barco mahnú tañuhú cán ta Jesús íin yií va nu núhu. ⁴⁸Ta naxini a ña ndóho ini na xíca tuun xihín á jáchi a cuú jácaca na barco ini ticuí jáchi mé xoo nuú cuhun na vaxi tachi. Tá sa cuahan tívi já xíca sáhá Jesús

cuahān nuú ticuií xoo nu ndúu na ta tá nācayati a nu ndúu na jalóho yaha saa cūhun a, nduu. ⁴⁹Joo tá naxini na xica sáhá Jesús nuú ticuií nācāhān na cúu á in ínimā já nācayuhú cóhó na. ⁵⁰Jáchī tóco ndihi na naxini ñahá nayihví na. Joo nandicāhan Jesús já cáchī a já:

—Ndacú coo ini ndó jáchī yehe va cúu u. A yíhvī toho ndó —nācachi Jesús.

⁵¹Tá nandaa Jesús jata barco nu cándójó na já najáyaa tachi. Chí nācatóntó mé na xica tuun xihín á cán. ⁵²Jáchī a ñáha tacu vaha ini na sahá ña nācāja Jesús tá nandaja cuaha mé á pan xihín tiyacá jáchī nandaji tuun xíní túní ná.

Tá nandaja vaha Jesús na quíhvī ndúu ñundáhyī Genesaret

(Mt. 14:34-36)

⁵³Naxinu na inga xoo tañuhú ta nācató ndaa na barco yuhú tañuhú cán já nasaa na ñundáhyī Genesaret. ⁵⁴Tá quéta Jesús xihín na xica tuun xihín á ini barco cán ivi laá nandicuni ñayivi mé á. ⁵⁵Já xínu na cuahān na ndijáá ñuu válí ndúu yati cán ndúcú na na quíhvī já ñéhe na na nuú xito cásaa na nu Jesús. ⁵⁶Ta ndá ñuu nācuu nu quíhvī Jesús cúu á ñuu náhnu á ñuu válí á yúcu já quéta ñayivi sácú na na quíhvī yuhú íchī. Ta já xica tahví na nu Jesús ña ná quiahva ñamanī canī ndaa ndáha ná a vatí loho yuhú jahmá a. Ta ndá na nācanī ndaa ndáha mé á ivi laá nandivaha na.

Ña cája quini ínimā ñayivi

(Mt. 15:1-20)

7 In tañuna fariseo xihín java na jánaha ley Moisés, na naquixi ñuu Jerusalén nācayati na nu íin Jesús. ²Ta naxojo ini na tá naxini na ña ndúu coo java na xica tuun xihín Jesús xíxi na tá cámanī ndahá na tá quiahva íin costumbre na Israel. ³Jáchī jánaha na fariseo xihín ndihi na Israel ña a cuú cuxu na tá cámanī ndahá vaha na tá quiahva íin costumbre tásáhnu jícó na. ⁴Ta jári jánaha na ña tá ndícó coo na sáhan na yahvi xíní ñúhú ndahá na tá quiahva íin costumbre na já ná cuu cuxu na. Ta íin cuahá ga nuú ñaha jánaha na ndítahan caja na tátuhun ña ndícata na yáxi xíhi na xihín tindohó xihín cohó caa anda xito quíji na viti, ndítahan ndicata na. ⁵Anda já nācasáhá na fariseo xihín na jánaha ley Moisés cáchī na já xihín Jesús.

—Ndávaha co cája na xica tuun xuhun tá quiahva nācachi tásáhnu jícó yo caja í. Ndávaha xíxi na tá cámanī ndahá na tá quiahva sáhndá ley caja í —nācachi na. ⁶Já nācachi Jesús já xihín ná:

—Mé a ndaa nācāhan profeta Isaías saha ndo jáchī co cúu ndó tá quiahva ndáa ndó.

Já nacahyí da já:

Yuhú ninu uun na cája cáhnu na yehe.

Ta co cája cáhnu na yehe xihín ndinuhu ínima ná.

⁷Mé a uun va quéa cája cáhnu na yehe,

jáchi ña jánaha na nuú ñayivi cúú á ña quixi jini mé cuití va na,
nacahyí Isaías sanahá.

⁸Jáchi najándacoo ndó ña nasahnda Ndióxi nu ndó caja ndó ta nacasáhá ndíco cáhnu ndó costumbre ña nacaja tásáhu jícó ndó. Ta sahá ña yóho ndícata ndó tindohó xihín yáxi xíhi ndó ta cája ndó cuahá chága costumbre yatá —nacachi Jesús xihín ná.

⁹Já nacachi tucu a já xihín ná:

—Sahá ña cúni ndó candíco cáhnu ndó costumbre mé va ndó sahá ña cán quéa najándacoo ndó ña nasahnda Ndióxi caja ndó. ¹⁰Jáchi já cáchí ley Moisés: “Caja cáhnún tátún xihín nánún”, ta jári cáchí a já: “Ndá na ná chicaan cháhan jatá tátá na á jatá náná na, ndítahan quivi na”, cáchí ley Moisés. ¹¹Joo ndóhó jánaha ndó nuú ñayivi ña cuu cahan na já xihín tátá na á náná na: “A cuú chindeé e ndóhó jáchi sa nasacu xoo i ñaha i quiahva i ña nu Ndióxi”, cáchí na. ¹²Tá ná cachi na ña yóho já quéa co ndúsa ga chíndeé na tátá na á náná na. ¹³Quiahva joho cája ndó sácu xóo ndó ña nasahnda Ndióxi nu ndó ta ndája ndó a tátuhun in ñaha ña coó saha. Jáchi ndíco cáhnu ndó costumbre ña najándadacoo tásáhu jícó ndó nu ndó ta quiahva já jánaha ndó nuú jáhyi ndó. Ta cuahá ga ñaha tátuhun ña yóho cája ndó —nacachi Jesús.

¹⁴Anda já nacana tucu Jesús ñayivi já nacachi a já xihín ná:

—Cuni joho ndihi ndó nu cáhan i xihín ndó ta candaa ini ndó ña. ¹⁵Ni in ñaha xíxi ñayivi a cuú caja quini ínima ná. Ña cuu ndaja quini ñayivi cúú ña quixi ínima na tátuhun ña cáhan na xihín ña cája na. ¹⁶Na ín joho, ná cuni joho na —cáchí Jesús.

¹⁷Tá nandihi nandihvi Jesús ini in vehe ta nacandoo cuahá ñayivi jatá véhe. Já nandaca tuhún na xíca tuun xihín á ña ndía cúni cachi a xihín tuhun nacahan xihín ná. ¹⁸Ta nanducú ñehe a tuhun nu ná já nacachi a já:

—Á coó toho xíni túni ri ndóhó va, vaha. Jáchi co cándaa ini ndó ña tócó ndihi ñaha xíxi ñayivi a cuú caja quini a na. ¹⁹Jáchi ña xíxi ñayivi co xínu a ini ínima ná joo xínu coo a tíxi na já queta tucu a yiquí cuñu na —nacachi Jesús.

Xihín tuhun yóho nacachi Jesús xihín ná ña cuu cuxu na tócó ndihi ñaha ña xíxi ñayivi jáchi co ndája quini a ínima ná. ²⁰Ta nacachi tucu Jesús já:

—Ña cuu ndaja quini ñayivi cúú ña quíxi ínima ná tátuhun tuhun cáhan na xihín ña cája na. ²¹Jáchi chí ini ínima ná quéta ña cáhvi núu ini na tátuhun ña cáhvi ini in dataa coo da xihín ñájíhí ñani táhan da á tá xíca ini

da coo da xihín in ñáñáha, ñá coo cúu ñájíhí da á tá cáhvi ini na cahní na ndíi. ²²Ta sa mé cán quéta ña xíca ini na caja cuíhná na ta jári xíca ini na coo cuahá ndivaha ñaha nu ná. Ta sa mé cán quéta ña núu cája na ta cáhan na ña tuhún ta cája na tá nuú cuachi ta cáhíhvi ini na ta cátóo na cahán na saha táhan na ta cája cáhnu na mé ná ta quíhvi cája na. ²³Tócó ndihi ña núu yóho ña cáhvi ini ñayivi caja na, quíxi a ínimá ná ta ndája quini a na.

Tá ñacandeeé ini in ñá tóho Jesús

(Mt. 15:21-28)

²⁴Já ñaquee Jesús cuahan chí ñundáhyi cuéntá Tiro xihín Sidón. Ta ñaquíhvi a in vehe coo a ta coo cúni a ña ná candaa ini na ñuu ña iin a cán joo coo ñacuu coo jehé a. ²⁵Chá va ta ñacandaa ini in ñáñáha ña íin Jesús vehe cán. Ta íin in jahyi jíhí ña, ña ndácaan ínimá quini ini. Ta ndaja coo nasaa ña ta ñacaxítí ña saha Jesús. ²⁶Ta cúu ña ña tóho cuéntá ñundáhyi Sirofenicia. Ta ñaxíca tahví ña nu Jesús ña ná tavá a ínimá quini ndácaan ini jahyi ña. ²⁷Anda já ñacachi Jesús já xihín ña:

—Jihna ñúhú ndítahan nuú i chindeé e na Israel anda jáví cuu chindeé e ndohó, na tóho jáchi íin in tuhun ta cáchí a ña a váha toho candaa í pan xíxi na valí ta jácana í ña nuú tina —ñacachi Jesús.

²⁸Anda já ñacachi mé ña tóho cán já xihín Jesús:

—Mé a ndaa cáhan ndó, xitoho. Joo anda tina, rí ndúu tixi mesa xíxi rí ña jácuu yahyi xitoho rí —ñacachi ña.

²⁹Anda já ñacachi Jesús já xihín ña:

—Vaha va ñacahun. Saha ña cán quéa cáchí i xuhun cuanúhu viti jáchi sa ñaqueta va ínimá quini nasandacaan ini jahyún —ñacachi Jesús.

³⁰Ta tá ñaxinu ña vehe já ñaxini ña cándúhu jahyi ña nuú xito ta sa coo ga ínimá quini cán ndácaan ini jahyi ña.

Tá ñandaja vaha Jesús in da jóho, da a cuú cahán

³¹Naquee Jesús ñundáhyi cuéntá Tiro ta ñayaha chí ñuu Sidón xihín java ga ñuu cuéntá Decápolis cán já ñaxinu coo a tañuhú Galilea. ³²Cán ñéhe na in dataa ñacasaa na nu Jesús. Cúu dá da jóho ta cúu dá da níhi. Ta ñaxíca na nu á ña ná chinúu a ndáha á jini dá já ná ndivaha da. ³³Já ñatavá xóo Jesús da tañu ñayivi cán. Já ñajáquíhvi a in nducu ndáha jóho da ta ñaxihnu a tójií a já ñacani ndaa a tójií a yáa dá. ³⁴Tá ñandihi nasandehé a indivi já ndísaa ndísaa ínimá á já ñacachi a já xihín dá:

—Efata —ñacachi a ta ña yóho cúni cachi: Ná ndinuna.

³⁵Ivi laá ñandinuna jóho mé da jóho cán ta ñandivaha yáa dá já ñacasáha cáhan vaha da. ³⁶Ta ñasahnda Jesús chuun nuú ndihi na ña ná a

cáxi tuhun na ña yóho nuú ni in ñayivi. Joo tá ñacachi a ña yóho já quéa ví ga ví cáhan na. ³⁷Chí catóntó ndihi ñayivi tá xini johó na ña ta cáhan xihin táhan na já cáchí na já:

—Vaha ndivaha cája Jesús tóco ndihi ñaha jáchi jánditacu a na johó ta jándicahan mé á na níhi —ñacachi na.

Tá ñasahan Jesús ña cuxu comi mil ñayivi

(Mt. 15:32-39)

8 Mé jánanditútú tucu cuahá ñayivi ta chí coó mé ñaha cuxu na. Anda já ñacana Jesús na xica tuun xihin á já ñacachi a já xihin ná:

²—Táhnda ndivaha ini i sahá ñayivi yóho jáchi sa ñaxinu uni quivi ndúu na xihin i yóho ta chí coó ga ñaha cuxu na. ³Ta co cuni chindahá i na nuhu na vehe na jáchi cámaní cuxu na ta tiaha náá cuitá na ta cuyu na íchi jáchi sa cání ndivaha ñaquixi java na —ñacachi Jesús.

⁴Anda já ñacachi na xica tuun xihin á cán já:

—Ndaa cáhan ndo. Ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —ñacachi na.

⁵Anda já ñandaca tuhún Jesús na já cáchí a já xihin ná:

—Ndaja pan cómí ndo.

Já ñacachi na cán já:

—Usa ña.

⁶Anda já ñasahnda Jesús chuun nuú ñayivi ña ná cacoo na nu núhu. Já ñatiin a ndihusa pan cán. Ta ñandiquiahva ndixahvi nu Ndióxi. Já ñasahnda java ña ta ñasahan ña nuú na xica tuun xihin á cán ña ná ndicahnda na ña nuú ñayivi cuahá cán. ⁷Ta jári ñasacomí na java tiyacá válí ta ñandiquiahva mé á ndixahvi nu Ndióxi saha ri já ñasahnda chuun nu ná ña ná ndicahnda na ri. ⁸Ta ñaxixi tóco ndihi na ndúu cán anda quiahva ñachutú tixi na ta tá ñandihí najáchutú na janda usa toyicá xihin ña ñacandoo. ⁹Tátuhun comi mil ñayivi ñaxixi. Ta tá ñandihí já najándindayí Jesús na. ¹⁰Já ñandihvi a ini barco xihin na xica tuun xihin á já ñaquee na cuahan na ñundáhyi cuéntá Dalmanuta.

Cuni na fariseo ña ná caja Jesús in ña xitúhún nu ná

(Mt. 16:1-4; Lc. 12:54-56)

¹¹Anda já ñaxinu na fariseo nu Jesús já ñacasáhá ndítúhún na xihin á. Ta sahá ña cuni na coto ndojó cuití ñahá na sahá ña cán quéa ñaxica na nu á ña ná caja in ña xitúhún, ña quixi indiví já ná canda ini na á mé a ndaa cúu á ña ñachindahá Ndióxi. ¹²Ndísaa ndísaa ini Jesús jáchi ndíhi ini a xihin ná já cáchí a já:

—Ndá saha quéa xica na yóho ña ná caja i in ña xitúhún. Mé a ndaa ná cahan i xihin ndó ña a cája i ñaha xitúhún nuú na yóho —ñacachi a.

¹³Anda já nandihvi tucu Jesús ini mé barco cán ta najándacoo a na cán já naquee a cuahan inga xoo tañuhú.

Tá cáhan Jesús sahá ña jánaha na fariseo

(Mt. 16:5-12)

¹⁴Ta ndaja coo nandindójó mé na xica tuun xihín a cán cañehe na ñaha cuxu na joo nasahiin in pan cuití va xihin ná ini barco cán. ¹⁵Anda já nasahnda Jesús chuun nu ná já cáchí a já xihin ná:

—Candehé ndo. Cuénta coo ndó xihín na fariseo ta xihín na cúu cuénta Herodes jáchi ña jánaha na cúu á tátuhun yusa naxaa ña cáva táhan na xihin harina cávaha na pan —nacachi Jesús.

¹⁶Coó nacandaa ini na ña cáchí a ña cán quéa nacasáhá ndítuhún xihin táhan na já cáchí na já:

—Sahá ña coó pan ñéhe vaxí sahá ña cán quéa cáhan Jesús ña yóho xoho —nacachi na.

¹⁷Sa nacandaa ini Jesús ña cáhan na ta já nacasáhá cáchí a já:

—Mé ndó cáchí ndó ña coó pan ñéhe vaxí jáchi co cándaa ini ndó ta ni co cája ndó cuénta sahá ña jánaha i. Nandaji tuun xini túni ndo. ¹⁸Cúu ndó tátuhun na co tívi nuu xihín na coó johó jáchi vatí xini ndo ta xini johó ndó joo co cándaa ini ndó. Á co ndícuun ini ndó ña nacaja i ¹⁹tá nandicahnda i ndíhuun pan nuú uhun mil taa. Ndaja toyicá nanditaca nacaja ndó xihín ña nacandoo cán —nacachi Jesús.

Já nanducú ñehe na tuhún nu á:

—Uxu ivi ña.

²⁰Ta nacachi tucu Jesús xihin ná já:

—Ta tá nandicahnda i usa pan nuú comi mil ñayivi, ndaja toyicá nanditaca nacaja ndó xihín ña nacandoo —nacachi a.

Já nanducú ñehe na tuhun nu á:

—Usa ña.

²¹Anda já nacachi a já xihin ná:

—Cámani yi va cándaa ini ndó —nacachi a.

Tá nandaja vaha Jesús in da cuáá ñuu Betsaida

²²Tá nandihí naxinu na ñuu Betsaida já ñehe na in da cuáá nacasaa na nu Jesús. Já naxica tahví na nu á ña ná cani ndaa ndáha á da. ²³Ta chí natiin a ndáha da cuáá cán já natavá a da yuhú ñuu. Nachindaa tójií a nduchú núu da já nachinúu a ndáha á jini dá. Já nandaca tuhún a da á cuu candehé da. ²⁴Ta já nacachi da cán já sándehe da:

—Sándehe e java taa joo tá quiahva ndaa yito quiahva já ndaa da xica nuu da xini i —nacachi da.

²⁵Anda já nāchinúu tucu Jesús ndáha á nduchú núú da já nasandehé ndaa da. Anda jáví nandivaha nduchú núú da ta nacasáhá sándehé cáxí vaha da tóco ndihi ñaha. ²⁶Ta nāchindahá Jesús da cuanúhu da vehe da já nācachi a já xihín dá:

—A ndíhvún mahnú ñuu ni a ndícanún ña yóho nuú ñayivi ndúu jan —nācachi a.

Tá cáxi tūhun ndaa Pedro ña cúu Jesús mé a nāchindahá Ndióxi cacomí cuénta sahá ñayivi

(Mt. 16:13-20; Lc. 9:18-21)

²⁷Tá nāndihi já nasahan Jesús xihín na xíca tuun xihín á ñuu válí ndácaan Cesarea cuénta Filipo. Nani xíca na cuahan na íchi nāndaca tūhún a na já cáxí a já xihín ná:

—Ndá da cáxí ñayivi cúu yehé —nācachi a.

²⁸Já nācachi na cán já:

—Java na cáxí na ña cúu ndó Juan, da nācāja ndúta ñayivi. Ta java na cáxí na ña cúu ndó profeta Elías. Ta java na cáxí na ña cúu ndó in táhan profeta nasanduu sanahá —nācachi na.

²⁹Anda já nāndaca tūhún tucu Jesús na já cáxí a já xihín ná:

—Ta ndóhó ri, ndá da cáxí ndo cúu u —nācachi a.

Anda já nācachi Pedro já xihín á:

—Mé ndó cúu Cristo, mé a nāchindahá Ndióxi cacomí cuénta sahá ñayivi —nācachi da.

³⁰Anda já nasahnda Jesús chuun nu ná ña ná a cáxi tūhun na ña yóho nuú ni in ñayivi.

Cáxi tūhun Jesús ña quivi a

(Mt. 16:21-28; Lc. 9:22-27)

³¹Anda já nacasáhá jánaha Jesús nu ná ña tandaa quiví ndoho ndivaha ini mé á, da nāchindahá Ndióxi nduu ñayivi. Ta na sacuahā veñuhu xihín na sacuahā nuú jutū xihín na jánaha ley Moisés candají na mé á janda quiahva ná cahní ñahá na. Joo tá ná xinu unī quivī nditacu tucu a. ³²Cáxí ndivaha nācahan Jesús ña yóho xihín ná ta chí anda já natavá xóo Pedro Jesús já nacasáhá jánani da a sahá ña nācachi a xihín ná. ³³Joo nācava Jesús ta nāndicoto nihni a nuú na xíca tuun xihín á já nacasáhá ndícuehe a xihín Pedro já cáxí a já xihín dá:

—Cuáhán quee Satanás, rí cúu tiñáhā sacuahā. Co íin xíní túnun tá quiahva íin xíní túnī Ndióxi jáchi cáhvi inún tá quiahva cáhvi ini ñayivi ñuyíví yóho —nācachi a.

³⁴Anda já nacana Jesús na xíca tuun xihín á xihín java ga ñayivi já nacachi a já xihín ná:

—Ndá na cúní candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coó caja toho a ná quivi na sahá i. ³⁵Jáchí ndá na cátóó coo chága ñuyíví yóho ndihi saha ná. Joo ndá na sahan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quivi. ³⁶Vatí ná quee vaha in na ñuyíví yóho ta cómí na tóco ndihi ñaha ñuyíví joo ndá chuun quea tá nu ndihí ndihi saha ná indayá. ³⁷Jáchí ni in ñaha a cuú chahvi in na saha ínimá ná ná a cühun na indayá. ³⁸Candehé ndo. Mé tiempo viti cája ñayivi cuahá cuachi ta co xéen na caja na ña sáhdá Ndióxi nu ná. Ta ndá na cacahan nuu sahá i xihín sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán ñaha ndaja cáhnu cúu yehe jáchi quixi i xihín ndée Ndióxi ta xihín ndée táto yíi mé á viti —nacachi Jesús.

9 Tanacachi tucu Jesús já xihín ná:

—Mé a ndaa ná cáhan i xihín ndo. Java na ndúu yóho a quíví toho na janda quiahva ná xinu quivi cuni na cacomí Ndióxi cuéntá sahá ñayivi xihín ndée mé á —nacachi a.

Tá nandijama Jesús quiahva cáa

(Mt. 17:1-13; Lc. 9:28-36)

²Tá nayaha inu quivi já nandaa Jesús in yucú jícó ta ndáca táhan Pedro xihín Jacobo xihín Juan cuahan na xihín á. Ta nu táhyí mé na cán nandijama quiahva cáa. ³Ta a juú quiahva nandiyehé jáhma ndíxi a chí nandiyaa cachi ña. Ni in ñayivi ñuyíví yóho a cuú ndicata yaa nahá jáhma tá quiahva yaa nanduu jáhma á. ⁴Anda já na xíca tuun xihín Jesús naxini na Elías xihín Moisés ndúu na ndítuhún na xihín á. ⁵Ta já nacachi Pedro já xihín Jesús:

—Maestro, vaha cúu ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías —nacachi da.

⁶Nayihví ndivaha na xíca tuun xihín Jesús sahá ña cán quea co xini mé Pedro ndía cáa cáhan va da. ⁷Anda já nanuu in vico jata ná já najajahvi a na ta tañu vico cán naxini johó na ña cáhan in a já cáchí a já:

—Da yóho cúu jahyi maní i. Cuni johó ndó nu cáhan da.

⁸Ta tá nandicoto nihni na sa coó ga na naxini na ta jandá in túhún Jesús naxini na.

⁹Tá sa cuahān nuu na jini yucu cān já nasahnda Jesús chuun nu ná ña ná a cáxi tuhun na nuú ñayivi ña naxini na anda quiahva ná xinu quivi nditacu tucu mé a nachindahá Ndióxi nduu ñayivi. ¹⁰Sahá ña cān quēa nachijehé tuhun na sahá joo nanditúhún xihín táhan na ndia cūni cachi Jesús tá nacachi a ña nditacu tucu a. ¹¹Anda já nacasáhá ndaca tuhún na mé á já cáchí na já xihín á:

—Ndávaha cáchí na jánaha ley Moisés ña ndítahan quixi jihna ñúhú profeta Elías —nacachi na.

¹²Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. Á co xini ndó ndá quiahva cáchí tuhun Ndióxi sahá da chindahá Ndióxi nduu ñayivi. Cáchí a ña ndoho ini da ta candají na da. ¹³Joo cáxi tuhun i nu ndó ña sa naquixi va Elías ta nacaja na tá quiahva cūni mé va na xihín dá ta tá quiahva cáchí tuhun Ndióxi ndoho da quiahva já nandoho da —nacachi Jesús.

Tá nandaja vaha Jesús in taa loho ndácaan ínima quini ini

(Mt. 17:14-21; Lc. 9:37-43)

¹⁴Tá nandihí já nandicó coo Jesús xihín na cān nu ndúu java ga na xica tuun xihín á cān. Já naxini na cuahá ndivaha ñayivi nacava nuu na na cān. Jári ñúhu java na jánaha ley Moisés cāni táhan yúhu ná xihín na xica tuun xihín Jesús. ¹⁵Tá naxini ñayivi yóho Jesús chí nācatóntó ndihi na já nandava nihni na nasahan na cāhan Ndióxi ná xihín á. ¹⁶Anda já nandaca tuhún Jesús na já cáchí a já xihín ná:

—Ndá saha ndítúhún ndó xihín na jan —nacachi a.

¹⁷In da cándichi cān nanducú ñehe da tuhun nu Jesús já cáchí da já:

—Maestro, yóho ñehe e jahyí i nacasaa i nu ndó jáchi ndácaan in ínima quini ini da ta nandaja níhi ñahá rí. ¹⁸Ndá nacuu tīn rí da, jándacava rí da nu ñúhu ta já cásahá cána cuyu chiquiñu yúhu dá ta cáhñá nuhu dá. Xihín ña yóho cásahá jácuitá rí da. Ta sa naxica i ñamaní nuú na xica tuun xihín ndó ña ná tavá na mé ínima quini yóho joo coo nacuu caja na ña —nacachi da.

¹⁹Já nacachi Jesús já xihín ná:

—Ndáhví nahá nacuu ndó jáchi sa cuahá ndivaha quivi iin i xihín ndo ta a ñaha candeé ini ndó yehe. Ta chí co ndeé ga ini i xihín ña cája ndó. Taxi ndó da loho jan chóho —nacachi a.

²⁰Chí ñehe na da loho cān nasaa na nu Jesús. Ta tá naxini mé rí quini ndácaan ini da loho Jesús ivi laá nacaja rí ña ná quivi yihí da loho cān já tíví núu da nandicava da nu ñúhu xihín chiquiñu cána yúhu dá. ²¹Anda já nandaca tuhún Jesús tátá da cān já cáchí a já xihín dá:

—Á sanahá ndóho jahyún ña yóho —ñacachi a.

Já ñacachi tátá da cán já:

—Janda tá loho da cája rí já xihín dá. ²²Ta cuahá tañu chícāan rí quini da ini yávi núhu xihín ini ticuíí viti ña cahní ñahá rí cúni rí. Ña cán quéa xíca tahví i nu ndó ña ná candáhvi loho ini ndó ndehe ta chindeé ndó ndehe tá ta cuu caja ndó ña —ñacachi da.

²³Anda já cáchí Jesús já xihín dá:

—Cuu caja i ña tá cándúsún yehe. Jáchi cuu caja i tóco ndihi ñaha xihín ñayivi tá cándeé ini na yehe —ñacachi a.

²⁴Ivi laá ñacayuhú tátá mé da loho cán já cáchí da já:

—Cándusa vi joo chindeé ndó yehe ná candusa chága i —ñacachi da.

²⁵Ta tá naxini Jesús ña ñacasáhá chútú cuahá ñayivi já nandicuehe mé á xihín mé rí quini cán já cáchí a já xihín rí:

—Ínima quini, rí nandaja níhi ta nandaja jóho da loho yóho, sáhdá i chuun nuun ña ná queún cuhun ta a ndíco coo gaún ndihvún ini da —ñacachi a.

²⁶Anda já ñacayuhú cóhó rí quini cán já ñasahní yihí tucu rí da. Chí ñaqueta rí cuahan rí ta najándacoo rí da loho cán tátuhun in ndii sahá ña cán quéa ñacasáhá cáchí ñayivi ña sa naxihi va da jan. ²⁷Joo natiin Jesús ndáha dá já nandínehe a da. Ta já nandaca ndichi da cán.

²⁸Ta tá nandihvi Jesús ini in vehe xihín na xíca tuun xihín á já nandaca tuhún jehé na mé á já cáchí na já xihín á:

—Ndávaha cóo ñacuu caja ndehe tavá nde ínima quini ñasandacaan ini da loho jan —ñacachi na.

²⁹Já ñacachi Jesús já xihín ná:

—Tá cúni ndó tavá ndo tá ínima quini táhan rí yóho ndítahan cajuhun ndó ta caca tahví ndo nu Ndióxi —ñacachi a.

Cáxi tuhun tucu Jesús ndaja coo nuú quivi a

(Mt. 17:22-23; Lc. 9:43-45)

³⁰Tá ñaquee na cuahan na ñayaha na chí estado Galilea ta co cúni Jesús ña ná candaa ini ñayivi ³¹jáchi jánaha Jesús nuú na xíca tuun xihín á cúni a. Ta cáchí a xihín ná ña vaxi quivi ndiquiahva ñayivi mé á, da ñachindahá Ndióxi nduu ñayivi ndahá ñayivi ta cahní ñahá na joo tá ná yaha uni quivi nditacu tucu a. ³²Joo cóo ñacandaa ini na ña cáhan xihín ná ta yíhvi na ndaca tuhún na mé á sahá tuhun cáhan.

Ndícani Jesús ndá na cúu na iin chága saha

(Mt. 18:1-5; Lc. 9:46-48)

³³Ta ndaja coo naxinu na ñuu Capernaum ta tá sa ndúu na vehe já ñacasáhá ndaca tuhún Jesús na xíca tuun xihín á já cáchí a já xihín ná:

—Ndía ndítúhún ndó sahá tá vaxi ndó íchi —nācachi a.

³⁴Joo coo nanducú ñehe nā cán tūhun nū á jáchi íchi nūu nāquixi na nandítúhún cuahā ná sahā ndá dā cúu dā cáhnu chága tañu mé ná. ³⁵Anda já nasācoo Jesús já nācana ndíhuxu ivi dā xíca tuun xihín á já nācasáhá cáchí a já xihín dā:

—Ndá ndó, nā cúni cacuu nā nū cuítí ndítahan ndaja núu ndó mé ndó cacuu ndó nā nū ndíhí ta caja ndíví ndo nū ndíhi na —nācachi a.

³⁶Tá nandíhi já nācana Jesús in dā loho já nasacu a dā mahñú nū ndúu na já nasāñehe ndaa dā já nācasáhá cáchí a já:

³⁷—Ndá nā ná ndiquehe vaha in dā loho tátūhun dā yóho sahá ña quíhvi ini na yehe, ndíquehe ri na yehe viti. Ta ndá nā ndíquehe yehe, a juú in túhún yehe ndíquehe na vaha jáchi ndíquehe ri na tátá i, mé a nāchindahá yehe —nācachi a.

Tá ndúu java nā ndíquehe sahā yo já quéa cuahan nā xoo í

(Mt. 10:42; Lc. 9:49-50)

³⁸Anda já nācachi Juan já:

—Maestro, naxini nde in dataa ta cáhan dā quívi mé ndó já tává dā ínima quini ñúhu ini ñayivi. Joo co xíca nuu dā xihín yo sahá ña cán quéa nasaji nuu nde nū dā caja dā ña —nācachi dā.

³⁹Joo nācachi Jesús já:

—A cáji nuu ndó nū dā jáchi tá cája in na ña xitúhún xihín quívi i já quéa a cuú caca nuu na cahān núu na sahá i. ⁴⁰Jáchi ndá nā co ndíndita caja xíxi xoho, mé nā cán cuahan nā xoo mí. ⁴¹Ta ndá nā ná quiahva in ñaha nū ndó vatí in yáxi ticuí sahá ña ndíco ndó yehe mé a ndaa ná cahān i xihín ndo ña chahvi tá chahvi Ndióxi sahá ñamaní cája na xihín ndó —nācachi Jesús.

Tá jándacava ñayivi inga na nuú cuachi

(Mt. 18:6-9; Lc. 17:1-2)

⁴²Ta cáchí tucu Jesús já:

—Ndá nā ná jándacava in nā ndahví, nā cāndeé ini yehe nuú cuachi janda vaha chága ná candíco in yuú yojó jico ná ta ná ndíhi sahá na cahā tañuhú. ⁴³Tá ndáha ndo quéa jándacava ndohó nuú cuachi chitúhún ndó a jáchi vaha chága ná cūhun ndó indiví xihín in túhún ndáha ndo a juú ga cūhun ndó xihín ndíví ndáha ndo indayá nuú co ndáhva ñúhu cáyi. ⁴⁴Ta cán ni ticujú co xíhi ni ñúhu cáyi co ndáhva. ⁴⁵Tá sahā ndo quéa jándacava ndohó nuú cuachi chitúhún ri ndó ña jan va jáchi vaha chága ná cūhun réncō ndó indiví xihín in túhún sahā ndo a juú ga cūhun ndó xihín ndíví sahā ndo indayá nuú co ndáhva ñúhu cáyi. ⁴⁶Ta cán ni ticujú co xíhi ta ni

ñúhu cáyi cō ndáhva. ⁴⁷Tá nduchú núú ndó quéa jándacava ndohó nuú cuachi tavá ndó ña jáchi vaha chága ná coo cóhó nuú ndó cūhun ndó nuú cacomí Ndióxi cuéntá saha ndo a juú ga ña ná coo ndíví nduchú núú ndo cūhun ndó indayá. ⁴⁸Ta cán ni cō xihí ticujú ta ni ñúhu cáyi cō ndáhva.

⁴⁹Tá quiahva ndívií jīuhún cuáan cája ñúhu cáyi quiahva já ndivií ínimā ñayivi xihín ña ndóho ini na. Ta tóco ndihi ñaha jóco na nu Ndióxi chícaan na ñii yívi na já cō tíví a. ⁵⁰Vaha va cája ñii jáchi xihín ñii ndíhaji ña xíxi na joo tá cō óhva ña já a cuú caja ohva tucu yó a já ná caja chúun tucú ña. Ndítahan nu ndóhó caja ndó tátuhun cája ñii ta já canduu víi xihín táhan ndó —cáchi Jesús.

Jánaḥa Jesús nuú na sa natandaha ña cō ndítahan jándacoo táhan na
(Mt. 19:1-12; Lc. 16:18)

10 Naquee Jesús ñuu Capernaum cuahan. Já nasahan estado Judea xihín ñundáhyi íin inga xoo yuta Jordán. Cán nacasáhá nanditaca tucu ñayivi nu á chí jánaḥa tucu a na tá quiahva nacaan mé á cája. ²Anda já nacayati java na fariseo nu Jesús sahá ña coto ndojó ñahá na cūni na. Nacachi na já xihín á:

—Á núná nuú in dataa jándacoo da ñájíhí da —nacachi na.

³Já nanducú ñehe Jesús tuhun nu ná já cáchi a já xihín ná:

—Ndaja cáchi ley Moisés ña ndítahan caja ndó —nacachi a.

⁴Anda já nacachi na cán já:

—Tá ná quiahva in dataa in tutu nu ñájíhí da sahá ña cūni da jándacoo da ña já quéa sahan ley Moisés ñamaní jándacoo da ña —nacachi na.

⁵Anda já nacachi Jesús já xihín ná:

—Sahan ley Moisés ñamaní yóho nu ndo jáchi táhyí ndivaha ínimā ndo.

⁶Joo janda mé saha tá nacavaha Ndióxi ñayivi nu cuítí já nacavaha in túhún taa xihín in túhún ñáha. ⁷Sahá ña cán quéa ndítahan nuú dataa jándacoo da tátá da xihín náná da já ndique táhan da xihín ñájíhí da. ⁸Já xinu ndíví na cán cacuu na tátuhun in víxí yiquí cuñu na sahá ña cán quéa cō cúú ga na ivi yiquí cuñu sahá ña nanduu na tátuhun in túhún yiquí cuñu. ⁹Sahá ña cán quéa cō ndítahan nuú na cán janí táhan na ña najácatáhan Ndióxi tá natandaha ná —nacachi Jesús xihín ná.

¹⁰Ta tá nandicó cōo tucu na vehe já nacasáhá tucu na xíca tuun xihín á cán ndáca tuhún na Jesús sahá ña nacaḥan. ¹¹Ta nanducú ñehe Jesús tuhun nu ná já nacachi a já:

—Tá ná jándacoo in dataa ñájíhí da ta tándaha dá xihín inga ñáñáha já quéa cája da cuachi nu ñájíhí nuú da jáchi íin da xihín inga ñáha. ¹²Ta tá ná jándacoo in ñáñáha yíi ña ta tándaha ñá xihín inga da cája ri ñá cán va cuachi nu yíi ña jáchi íin ñá xihín inga dataa —nacachi Jesús.

Cája yíi Jesús na valí
(Mt. 19:13-15; Lc. 18:15-17)

¹³Anda já ñéhe na java na valí nacasaa na nu Jesús ña ná caní ndaa ndáha á na. Joo mé na xíca tuun xihín á cán nacasáha na cája cuehe na xihín mé na ndáca na valí cán. ¹⁴Tá naxini Jesús ña cája na já nandicuehe a já cáchí a já xihín na xíca tuun xihín á:

—Quiahva ndó ñamaní ná quixi na valí nuú i ta a cájí nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. ¹⁵Mé a ndaa ná cahán i xihín ndo ndá na co cúní ndiquiahva na mé ná ndáha Ndióxi tátuhun cája na valí yóho já quea a cúu cacomí Ndióxi cuéntá sahá ná —nacachi a.

¹⁶Anda já nacasáha Jesús ñéhe ndaa na valí ta chínúu a ndáha á jini ná já cája yíi á na.

Cáhan in da cuicá xihín Jesús
(Mt. 19:16-30; Lc. 18:18-30)

¹⁷Tá cuahan tucu Jesús íchi já xínu in dataa nacasaa da nasaxítí da nu á já cáchí da já xihín á:

—Maestro, mé ndó cúú ndó taa vaha ña cán quea ndáca tuhún i ndohó ndía ndítahan caja i já ná ñehe táhvi cuhun i indiví coo i anda ama cáa quivi —nacachi da.

¹⁸Já nacachi Jesús já xihín dá:

—Ndá cuéntá quea cáchún xihín i ña cúú u da vaha. Ni in túhún toho ñayivi co cúú ná na vaha ñuyíví yóho. In túhún Ndióxi cuití va quea vaha. ¹⁹Sa xíní vún ña sáhdá Ndióxi nuun cajún já cáchí a já: “Coto a cóun xihín ñájíhí á yí ñani táhún. Coto a cáhnún ndii. Coto a cája cuíhnún. Coto a cáchún ña tuhún sahá ñayivi. Coto a jándahvún ñayivi. Ta caja cáhnún tátún xihín nánún” —nacachi Jesús xihín dá.

²⁰Já nacachi da cán já:

—Maestro, janda tá nasacuu u taa loho nacasáha i cája i tóco ndihi ña sáhdá Ndióxi caja i —nacachi da.

²¹Nasandehé Jesús nu dá ta táhnda ini a sahá dá já nacachi a já xihín dá:

—Inga ñaha cámaní cajún: Cuáhán jicún tóco ndihi ñahún jan ta ndacahndún jiuhún jan nuú na ndahví já ñehe táhvún coo cuhá ñahún indiví. Ta tá nandihí já quisún candicún yehe —nacachi Jesús.

²²Joo tá naxini johó da cuicá cán ña nacachi Jesús ivi laá nacavítá ini da já naquee cuéha dá cuahan da jáchi iin cuhá ndivaha ñaha da.

²³Anda já nacasáha sándehé Jesús nuú na xíca tuun xihín a cán já nacachi a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuénta saha ná —nacachi a.

²⁴Chí nacatontó mé na xica tuun xihin á cán saha tuhun nahan joo nandican tucu Jesús já cáchí a já:

—Jahyi a, ndaja yáncá cáa saha in na candeé ini jiahun ndiquiahva na mé ná ndáha Ndióxi ña ná cacomí a cuénta saha ná. ²⁵Jáchí janda cama chaga cuu yaha in camello ini in yavi saha yitucú a juú ga ña ná ndiquiahva in da cuicá mé dá ndáha Ndióxi ña ná cacomí a cuénta saha dá —nacachi Jesús.

²⁶Anda já nacatontó ndihi mé na xica tuun xihin á cán tá naxini johó na ña yóho. Já nacasáha ndaca tuhun táhan na já cáchí na já:

—Ndá na cúu na cuu cacu ndaa ínima, dá já —nacachi na.

²⁷Nandicoto nihni Jesús nu ná já cáchí a já xihin ná:

—Ni in na a cúu caja ña yóho joo Ndióxi quéa cuu caja ña jáchí ni in ñaha co íhvi toho nu Ndióxi —nacachi a.

²⁸Anda já nacachi Pedro já xihin Jesús:

—Joo ndehe najandacoo ndihi nde ña nasacomí nde ta ndíco nde ndohó —nacachi da.

²⁹Já nanducú ñehe Jesús tuhun nu ná já cáchí a já:

—Mé a ndaa ná cahan i xihin ndo ña ndá na jándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi ná saha yehe xihin saha tuhun cahan i, ³⁰na cán cúu na ñehe cuaha chaga ví ñaha ñuyíví yóho jatá ña najandacoo na tátuhun vehe na, ñani na, quiahva na, náná na, jahyi na, ñundáhyi ná viti vatí ná ndicuítá ñayivi caja xíxi na xihin ná. Joo ñehe táhvi ná catacu na anda ama cáa quivi xihin Ndióxi. ³¹Ta ndúu cuahá na íin saha ñuyíví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quivi cacuu na na íin saha nu Ndióxi —nacachi a.

Cáxi tuhun tucu Jesús ña quivi a

(Mt. 20:17-19; Lc. 18:31-34)

³²Ta ndaja coo cuahan Jesús xihin na xica tuun xihin á chí íchí ndaa cuahan chí Jerusalén. Cánuu Jesús cuahan xihin ná. Ta nacatontó na cán ta yíhvi na cuahan na xihin á. Anda já natavá xóo tucu a ndíhuxu ivi na xica tuun xihin á já nacasáha cahan xihin ná ña ndoho a chaga chí nuu. ³³Já nacachi a já:

—Candehé ndo. Yóho ndaa í cuahan yo chí Jerusalén nuú ndiquiahva na yehe, da nachindahá Ndióxi nduu ñayivi ndahá na sacuaha nuú jutú xihin nuú na jánaha ley Moisés. Na yóho cúu na cacu ini saha ndaja quivi i. Anda já ndiquiahva na yehe ndahá na tóho. ³⁴Cuacu ndaa na yehe ta cani

na yehe ta cuihna na tójií na nuú i ta já cahní na yehe. Joo tá ná yaha uní quiví nditacu tucu u —ñacachi Jesús xihín ná.

Tá naxica Jacobo xihín Juan ñamani nu Jesús

(Mt. 20:20-28)

³⁵Anda já ñacayati Jacobo xihín Juan, jahyi Zebedeo nu Jesús já ñacachi da já xihín á:

—Maestro, cúní nde caca nde in ñamani nu ndo —ñacachi da.

³⁶Já ñacachi Jesús já xihín dá:

—Ndía maní cúní ndó caja i xihín ndo —ñacachi a.

³⁷Já ñacachi da cán já xihín á:

—Ña xica nde nu ndo quea ná quiahva ndó ñamani nuú nde cacoo in in nde xoo jín ndo. In nde coo xoo cuáha ta in nde coo xoo íti jín mé ndó indiví nuú coo ndó cacomí ndó cuénta sahá ñayivi —ñacachi da.

³⁸Anda já ñacachi Jesús já xihín dá:

—Co cándaa ini ndó ña xica ndó nuú i. Á cuu ndoho ini ndó tá quiahva ndítahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á íin tiaha ndó ndoho ini ndó tá quiahva nditahan nuú i ndoho ini i anda quiahva ná quivi i —ñacachi a.

³⁹Já ñacachi da cán já:

—Cuu caja nde ña.

Já ñacachi Jesús já xihín dá:

—Mé a ndaa tandaa quivi coho ndó ña ova núhu ini yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. ⁴⁰Joo sahá ña cacoo in ndó xoo cuáha i ta in ndó xoo íti i a juú nuú i quiahva i ña nu ndo. Jáchi sa nandicaxi Ndióxi na ñehe táhvi cacoo cán —ñacachi Jesús xihín dá.

⁴¹Tá naxini johu uxu chaga na xica tuun xihín Jesús cán ña yóho já ñacasáha xójo ini na xihín Jacobo xihín Juan viti. ⁴²Joo ñacana Jesús na já ñacachi a já xihín ná:

—Sa xíní ndó ndaja cája na sáhdá chuun nuú ñayivi ndúu ñuyíví yóho. Ña cája na quea jácandíhi na ñayivi ta cája na tá quiahva cúní mé ná.

⁴³Joo co ndítahan coo ña cán tañu mé ndó jáchi ndá da cúní cacuu da cáhnu chaga tañu ndó xíní núhú cacuu da in da cája ndíví nuú ndihi ndó.

⁴⁴Ta ndá da cúní cacuu ta nu cuítí tañu ndóhó ndítahan cacuu da da cája ndíví nu ndihi ndó. ⁴⁵Jáchi ni yehe, da nachindahá Ndióxi nduu ñayivi coo naquixi i ñuyíví yóho ña ná caja ndíví ñayivi nuú i. Ña naquixi i caja i quea caja ndíví i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cúhun na indayá —ñacachi a.

Tá nandaja vaha Jesús in da cuaá naní Bartimeo

(Mt. 20:29-34; Lc. 18:35-43)

⁴⁶Anda já naxinu na ñuu Jericó. Ta tá sa naqueta tucu Jesús cuahan jatá ñuu cán xihín na xíca tuun xihín á xihín cuahá ga ñayivi ta mé yuhú íchi cán íin coo in da cuaá naní Bartimeo, jahyi Timeo sáti da. ⁴⁷Ta tá naxini johó da ña cáyati Jesús, da ñuu Nazaret vaxi da já nacasáhá mé da cuaá cán cáyuhú cóhó da já cáchí da já:

—Jesús, da naquixi chichi David caja ndó ñamaní candáhví loho ini ndó yehe —nacachi da.

⁴⁸Joo nacasáhá cuahá ñayivi cája cuehe na xihín dá ña ná caji da yúhu dá. Joo ví ga ví cáyuhú da já cáchí da já:

—Ndóhó, da naquixi chichi David caja ndó ñamaní candáhví loho ini ndó yehe —nacachi da.

⁴⁹Anda já nandaca ndichi Jesús já nacachi a já:

—Cana ndó da ná quixi da.

Já nacana na da cuaá cán já cáchí na já xihín dá:

—A ndícani inún. Candichi jáchi cána Jesús yohó —nacachi na.

⁵⁰Anda já najácana da cotó ndeé da ta nandaca ndichi da já nasaa da nu íin Jesús. ⁵¹Anda já nandaca tuhún Jesús da já cáchí a já xihín dá:

—Ndía cúnun ná caji i xuhun.

Já nacachi mé da cuaá cán já:

—Candehé e cuni, xitoho.

⁵²Já nacachi Jesús já xihín dá:

—Cuu nuhu vún viti. Sa nandivahún jáchi nacandee inún yehe —nacachi a.

Chí ivi láa nandaca ndehé da cuaá cán. Já nandico da Jesús íchi cán cuahan da.

Ndíhvi Jesús ñuu Jerusalén

(Mt. 21:1-11; Lc. 19:28-40; Jn. 12:12-19)

11 Tánaxinu na yati ñuu Jerusalén jíin ñuu Betfagé xihín ñuu Betania ña ndíque táhan nuu xihín yúcu yitó Olivo já nasahnda Jesús chuun nuú ivi da xíca tuun xihín á. ²Já cáchí a já xihín dá:

—Cuáhán ndó ñuu loho ndácaan yati jan. Tá ná xinu coo ndó jan ndiñehe ndó in búrró ndíco ndaa, rí cámaní yii ndaa na. Ndaxí ndó rí ta cañehe ndó rí quixi ndó. ³Ta ndá na ná ndaca tuhún ndohó saha rí já quéa cachi ndó xihín ná ña xíní ñúhú xitoho ndó rí viti joo tá ná ndihi chuun rí já ndixi tucu rí, já cachi ndó xihín ná —nacachi Jesús xihín da.

⁴Ta naquee da cán cuahan da já nandiñehe dá mé búrró cán ndíco ndaa rí jíin yéhe yuhú íchi já ndaxí da rí.

⁵Ta ndaja coo java na ndúu cán nacasáhá cáchí na já:

—Ndía cája ndó. Ndávaha ndaxí ndo búrrō jana nde jan —nacachi na.

⁶Anda já nanducú ñehe mé da xíca tuun xihín Jesús cán tūhun nu ná ta nacachi da tá quiahva nacachi Jesús xihín dá. Anda já ñahehe dá ñamaní cañehe da rí cūhun da. ⁷Tá nandihí já ñehe da búrrō cán nacasaa da nu Jesús já nachojó da cotó ndée da jata rí já nandaa Jesús jata rí. ⁸Ta cuahá ñayivi nacasáhá na chinduu na cotó ndée na íchi ta java na nacasáhá na sáhdá na ndáha yító já chinduu na do íchi. ⁹Ta na cuahan chí nuu ta jári na vaxi chí jata nacasáhá na cáyuhú na já cáchí na já:

—Cája cáhnu í Ndióxi. Ndicáhnu nahá ná cacuu da cómí cuéntá saha yo jáchi cúu dá da vaxi yuhú nuu Ndióxi. ¹⁰Cáhnu ná coo quiví tá casáhá Ndióxi cacomí a cuéntá saha yo. Tá quiahva nasacomí David, tátá yo cuéntá sahá ñayivi sanahá quiahva já cacomí mé á cuéntá saha yo. Cáhnu ná cacuu Ndióxi —cáchí ñayivi.

¹¹Anda já nandihvi Jesús ñuu Jerusalén ta já naxinu a veñuhu cáhnu cán. Ta tá nandihí nasandehé ndihí a nítí xoo cán já naquee a cuahan chí ñuu Betania xihín ndíhuxu ivi na xíca tuun xihín á jáchi sa nahini ta cuahan cuáa va.

Tá nachicaan Jesús cháhan jata titó ñuhú

(Mt. 21:18-19)

¹²Tá naquee na Betania inga quiví itaan já nacasáhá cuíco Jesús cuahan.

¹³Tá naxini xíca a in titó ñuhú vaha dó ndoco ndáha. Nasahan Jesús sándehe a á íin cuihi nu do joo co rí ná ñehe a. Ndáha uun va dó cán íin jáchi a juú tiempo coo rí cán queá. ¹⁴Anda já nacaan Jesús xihín titó ñuhú cán já cáchí a já xihín do:

—Ni in ga na a cáxí ga cuihi nu yóhó —cáchí a xihín do.

Ta naxini johó na xíca tuun xihín á cán tūhun yóho.

Tá ntaxí Jesús na ndúu jícó ñaha yéhe veñuhu

(Mt. 21:12-17; Lc. 19:45-48; Jn. 2:13-22)

¹⁵Tá nandihí já naxinu na Jerusalén. Ta tá nandihvi Jesús veñuhu cáhnu cán já nacasáhá táxí a na ndúu jícó cán xihín na ndúu xéen viti. Ta naxicó ñehe a mesa na ndúu ndíjama jiuhún ñayivi ta naxicó ñehe a táyí sácoo na ndúu jícó ndíjata. ¹⁶Ta chí cóo nasahan ñamaní nuú ñayivi cañehe na ñaha ndihvi na veñuhu. ¹⁷Anda já nacasáhá jánaha nu ná já cáchí a já xihín ná:

—Já cáchí tūhun Ndióxi: “Vehe mí í cacuu a vehe nuú quixi na caca tahví na nuú í saha tóco ndihí ñayivi ñuyíví”, cáchí tūhun Ndióxi. Joo ndóhó nandai cuu ndó yóho caja cuíhná ndo nuú ñayivi —nacachi Jesús xihín ná.

¹⁸Tá mé na sacuahā nuú jutū cān xihín na jánahā ley Moisés naxini johō na ña yóho já nacasáhā na ndúcú na ndá quiahva cahní na a jáchí yíhví ñahā na sahā ña cātóntó ndihi ñayivi xihín ña jánahā mé á nu ná. ¹⁹Joo tá nacuaá já naquee Jesús ñuu cuahan xihín na xíca tuun xihín á.

Tá nahichí titó ñuhú, dó coó cuihi nuu

(Mt. 21:20-22)

²⁰Ta naha chá inga quiví itaan nayaha na nu cándichi mé titó ñuhú cān já naxini na ña nahichí do janda yóho do nahichí. ²¹Anda já nandicuhun ini Pedro sahā mé titó ñuhú já cáchí da já xihín Jesús:

—Maestro, candehe ndó titó ñuhú, dó nacahan cuehe ndó xihín. Sa nahichí dó viti —nacachi da.

²²Já nacachi Jesús já xihín dá:

—Candeé ini ndó Ndióxi. ²³Jáchí mé a ndaa ná cahan i xihín ndo ña tá ná cachi ndó xihín yúcu yóho: “Caxoo ta cuáhán jáquetún mún ini tañuhú”, ta tá co cáhvi ivi johō ini ndó ta tá candúsa ndó coo tá íin cáchí ndó ta chí já ndusa coo. ²⁴Sahā ña cān quea cáchí i xihín ndo ña tóco ndihi ñaha xíca tahví ndó nu Ndióxi ta tá candúsa ndó ña sa ñahehe ndó a já quea ñehe ndusa ndó a. ²⁵Ta tá ndúu ndó xíca tahví ndo nu Ndióxi xíní ñuhú caja cáhnu ini ndó sahā ndá na xójo ini ndó xihín já ná caja cáhnu ri ini Ndióxi, tátá ndo ña íin indiví sahā cuachi ndó. ²⁶Joo tá co cája cáhnu ini ndó sahā ñayivi já quea ni Ndióxi, tátá ndo ña íin indiví a cája cáhnu ini a sahā cuachi ndó —nacachi a.

Tá nandaca tuhún na Jesús ña ndáchí quíxi ndée á ña cája cuahá nuú ñaha

(Mt. 21:23-27; Lc. 20:1-8)

²⁷Anda já nandicó coo tucu na ñuu Jerusalén. Ta tá xíca Jesús chí veñuhu cáhnu cān já nacayati na sacuahā nuú jutū xihín na jánahā ley Moisés xihín na sacuahā veñuhu nu á. ²⁸Já nandaca tuhún na Jesús já cáchí na já xihín á:

—Yo já sáhan ñamani nuun cajún ña cájún yóho —nacachi na.

²⁹Já nacachi Jesús já xihín ná:

—Ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndo yo já nasahan ñamani nuú i caja i ña cája i yóho. ³⁰Cachi ndó xihín i yo já nachindahá Juan ña ná quixi da caja ndúta da ñayivi. Á Ndióxi nachindahá da, á ñayivi nachindahá ñahá. Nducú ñehe quíi ndó tuhun nuú i viti —nacachi Jesús xihín ná.

³¹Anda já nacasáhā ndítuhún xihín táhan na cān já cáchí na já:

—Tá ná cáchí ña Ndióxi quea nachindahá Juan ta já nducú ñehe Jesús tuhun nu yo já cachi da xóho: “Ndá cuéntá quea coó naxeen ndó candúsa

ndó da, dá já”, cachi Jesús xohó. ³²Ta tá ná cachí: “Ñayivi cúu na nachindahá Juan”, já ndicuítā ñayivi xihín yo —nacachi na ndítúhún xihín táhan na.

Já cachí na jáchi yíhví na ñayivi jáchi tóco ndihi ñayivi nacahán na saha Juan ña cúu dá da nachindahá Ndióxi jáyaha da tuhun cáhan mé á nuú ñayivi. ³³Sahá ña cán quéa nacachi na já xihín Jesús:

—Cō xíní toho nde yo nachindahá Juan.

Anda já nacachi a já xihín ná:

—Ta ni yehe a cáxi tuhun i nu ndo yo já nasahan ndée nuú i caja i ña yóho —nacachi a.

Sácú Jesús quiahva sahá java mozo, da nacaja quini xihín xitoho

(Mt. 21:33-46; Lc. 20:9-19)

12 Anda já nacasáhá Jesús sácú a quiahva nuú ñayivi já nacachi a já xihín ná:

—Nasahiin in dataa najándee cuaha dá tó uva nu núhu dá ta já nasacu da in corra yító nu do. Ta nacavaha da in nuú cuhni mé uva cán ña cavaha vino. Ta nacavaha da in nu jícó canúu da já cuu candaa da tóco ndihi dó cán.

“Tá nandihí já nasahan ndojó da núhu dá nuú java na caja chúun na ña já naquee da cuahan xíca da. ²Ta tá naxinu tiempo jáquee na já nachindahá da in mozo da nuú na cája chúun núhu da cán ña ná ndiquiahva na ña cáni nu dá ndiquehe da saha núhu da ña nasahan ndojó da nuú na cán. ³Joo mé na cája chúun tóo núhu cán natiin na mozo da cán já nacani na da. Tá nandihí já nanducú ñehe na da nuú xitoho da joo coó ñaha ná sahan na nu dá. ⁴Anda já nachindahá tucu mé da xihín ñaha núhu cán inga mozo. Joo da yóho nacaja xíxi tucu na xihín dá jáchi nacani na da xihín yuu. Ta najándicuehe na jini dá já nacasáhá canahá na xihín dá. ⁵Ta mé da xihín ñaha núhu cán nachindahá tucu da inga mozo da ta nasahní na da. Ta nachindahá cuahá ga da mozo da nasahan cán. Ta java da nacani na ta java da nasahní na.

⁶Nacandoo in túhún jahyi mé da xihín ñaha núhu cán ta quíhví ndivaha ini da jahyi da. Joo tá nu ndíhí já nachindahá da jahyi da jáchi cáhán da:

“Cája i cuénta coo toní núhú na xihín jahyí i”, nacahán da. ⁷Joo mé na cája chúun núhu cán nacasáhá ndítúhún xihín táhan na já cachí na já:

“Candehé ndo. Yóho vaxi da cúu jahyi xitoho í. Ta tá ná xinú quiví quivi xitoho í ta da yóho cacuu da ndicojo chuun saha núhu yóho. Cóho cahní yó da já ná candoo núhu yóho ndáha mí”, nacachi xihín táhan na cán.

⁸Anda já natiin na da cán ta nasahní na da já najácana na yiquí cuñu da jata cútu cán —nacachi Jesús.

⁹Anda já nandaca tühún Jesús ñayivi ndúu cán já cáchí a já:

—Á cō xíní ndó ndíá caja da xihín ñaha ñúhu yóho viti. Ña caja da queá quixi da ta cahní ndihi da na cája chúun tóo nu ñúhu dá. Já ndiquiahva da ñúhu dá nuú java ga na já ná caja chúun na nu á.

¹⁰Á cō xíní ndó ña cáchí tühun Ndióxi. Ña cáchí a queá:

Mé yuu ña najácana da cávaha vehe,

ñá cán cúú ña nanduu yuu ndúhu sahá vehe ña íin chága saha.

¹¹Ña yóho queá nacaja Ndióxi ta cúú á in ñaha cáhnu ndivaha nu yo, cáchí tühun Ndióxi —nacachi Jesús.

¹²Anda já nacasáhá ndúcú na sacuahá tiin na Jesús chicaan na a vecaa jáchi nacandaa ini na ña saha mé ná nasacu a quiahva yóho. Joo sahá ña yíhví na ñayivi najándacoo na a ta naquee na cuahan na.

Ndáca tühún na Jesús á ndítahan nu ná चाहvi na jiuhún cuéntá impuesto

(Mt. 22:15-22; Lc. 20:20-26)

¹³Tá nandihí já nachindahá na java na fariseo xihín na cúú cuéntá Herodes nu Jesús ña ná coto ndojó ñahá na xihín tühun cáhan mé á já ná chicaan na cuachi jatá. ¹⁴Anda já naxinu na nu Jesús já cáchí na já xihín á:

—Maestro, xíní nde ña ndinuhu ña ndaa cáhan mé ndó. Ta cō quehe ndó cuéntá tá cáhan núu ñayivi saha ndo. Ta cándaa ini nde ña tá cáhan ndó sahá in ñaha cája ñayivi cúú á sahá ña sándehe ndó janda ínima ná. Ta cándaa ini nde ña jánaha ndó ña ndaa saha íchi cuéntá Ndióxi. Ta viti cúni nde ndaca tühún nde ndohó á ndítahan nuú nde चाहvi nde jiuhún cuéntá impuesto nuú da cómí cuéntá saha yo ñuu Roma. Á चाहvi nde ña, á a चाहvi toho nde ña —nacachi na.

¹⁵Joo sa nacandaa ini Jesús ña cō cúú ná tá quiahva ndaa na ña cán queá nacachi a já xihín ná:

—Cándaa cáxí táhyí ini i ña cúni ndó coto ndojó cuití ndó yehe. Jánaha ndó in táhan jiuhún jan nuú i ná candehe e ña —nacachi a.

¹⁶Já nasahan na mé jiuhún cán nu á ta tá naxini a ña já nacachi a já xihín ná:

—Yo nahná ta yo quiví queá ndaa nu á.

Já nacachi na cán já xihín á:

—Ñéhe a quiví xihín nahná da cómí cuéntá saha yó ñuu Roma

—nacachi na xihín á.

¹⁷Anda já nacachi Jesús já xihín ná:

—Ndiquiahva ndó ñaha da cómí cuéntá saha ndó ñuu Roma jan nu dá. Ta ndiquiahva ndó nu Ndióxi ña cúú ñaha mé á —nacachi a.

Chí nacatóntó mé na cán sahá ña nacachi Jesús xihín ná.

Ndáca tühún na saduceo Jesús á mé a ndaa nditacu ndii

(Mt. 22:23-33; Lc. 20:27-40)

¹⁸Anda já nasahan java na saduceo cahan na xihín Jesús. Ta mé na saduceo yóho co cándusa na ña nditacu tucu na sa naxihí. Sahá ña cán quéa nandaca tühún na Jesús já cáchí na já xihín á:

¹⁹—Maestro, nu ley nacyhi Moisés sanahá natahnda chuun ta cáchí a já: “Tá tandaha in dataa xihín ñájíhí da ta tá coó jahyi ña cacu xihín dá ta tá ná xinu quivi quivi da cán já quéa cáchí ley Moisés ña nditahan tandaha tucu ñájíhí da xihín da cúu ñani mé ndii cán já ná coo jahyi da cán xihín yuhú nuú ñani da”, já cáchí ley Moisés. ²⁰Ta viti cuni johó ndó ná cacu nde in quiahva nu ndó. Nasahiin usa ñani ta da nu cuítí natandaha dá xihín in ñañáha. Tá nandihí naxihí da joo coó jahyi da ná cacu xihín ña cán. ²¹Ta natandaha ñani da, da chí ivi xihín ña cuáan cán. Ta já naxihí ri da cán va ta ni da yóho coó nacacu jahyi xihín ñájíhí ñani. Ta quiahva já nandoho ri ñani da, da chí uni. ²²Anda quiahva naxinu ndíhusa da natandaha xihín ña ta ni in da coó nacacu jahyi xihín ña. Tá nu ndíhí naxihí ri mé va ña. ²³Ta viti ndáca tühún nde ndohó ndá da cacuu ndusa yíi ña cán tá ná xinu quivi nditacu tucu ndii jáchí ndíhusa va ñani da cán natandaha xihín ña —nacachi na.

²⁴Anda já nanducú ñehe Jesús tühun nu ná já cáchí a já xihín ná:

—A váha toho cáhvi ini ndó jáchí co xíní ndó ndaja cahan tühun Ndióxi ta ni co xíní ndó ndá quiahva cáhnu cúu ndée Ndióxi. ²⁵Jáchí tá ná nditacu tucu ndii a tandaha ga na ta ni a quiahva na jahyi jíhí na tandaha ná. Cacuu na tátuhun táto Ndióxi ndúu indiví ta co tandahá na cán. ²⁶Joo sa xíní yo ña nditacu tucu ndii. Á a ñaha cahvi ndó ña nacyhi Moisés sahá ña nacyhan Ndióxi xihín dá tañu tohínú, dó cándaha ñúhu cán. Já nacachi a já xihín dá: “Yehe cúu Ndióxi cája cáhnu Abraham ta yehe cúu Ndióxi cája cáhnu Isaac ta yehe cúu Ndióxi cája cáhnu Jacob”, nacachi a. ²⁷Ta ña yóho cúní cachi a ña tácu yíi va Abraham xihín Isaac xihín Jacob vatí sa naxihí yiquí cuñu na. Sahá ña cán quéa co xíní ndó ndá saha cahan ndo —nacachi a.

Tá cahan Jesús ndia cúu ña cáhnu chága sáhndá Ndióxi caja í

(Mt. 22:34-40)

²⁸Ta ndaja coo in da jánaha ley Moisés nacayati da nu Jesús jáchí sa naxini johó da ña nacyhan Jesús xihín na ndúu cán. Sahá ña xíní da ña nanducú ñehe ndaa Jesús tühun nuú na cán sahá ña cán quéa nandaca tühún da Jesús já cáchí da já xihín á:

—Ndia cúu ña cáhnu chága sáhndá Ndióxi caja í —nacachi da.

²⁹Já nacachi Jesús já xihin dá:

—Ñá cáhnu chága cúú ñá cáchí tuhun Ndióxí yóho: “Taa jóho ndó, na Israel. Íin in túhún jini Ndióxí ta mé á cúú xitoho í. ³⁰Ta ndítahan quihvi ini ndó mé Ndióxí, xitoho ndó xihin tócó ndihi ínima ndo ta xihin ndinuhu ini ndó. Ta quihvi ini ndó a xihin tócó ndihi xíní túní ndo ta xihin tócó ndihi ndée ndo.” Ñá yóho cúú ñá nu cuítí sáhndá Ndióxí caja ndó. ³¹Tá cúní coo ñá nu cuítí já cúní coo ri ñá chí ivi va ta cáchí a: “Quihvi ini ndó ñani táhan ndó tá quiahva quihvi ini ndó mé ndó.” Coó ga inga ñá sáhndá Ndióxí caja ndó cacuu ñá cáhnu chága nuú ñá yóho —nacachi a.

³²Anda já nacachi mé da jánaha ley Moisés cán xihin Jesús:

—Vaha chá nacahan ndó, Maestro. Mé a ndaa quéa nacahan ndo ñá ínin tálaá cuítí Ndióxí ta coó inga ga Ndióxí. ³³Ta ndítahan quihvi iní mé á xihin tócó ndihi ínima yó ta xihin ndinuhu iní ta xihin tócó ndihi xíní túní yó ta xihin tócó ndihi ndée yó. Ta ndítahan quihvi iní ñani táhan í tá quiahva quihvi iní mí. Ndíyahvi chága ñá yóho a juú ga tócó ndihi ñaha jócó na nu Ndióxí ta ndíyahvi chága ñá a juú ga ñaha chícaan ñúhu ná nu náa —nacachi da.

³⁴Tá naxini Jesús ñá nanducú ñehe vaha da cán tuhun nu á já cáchí a já xihin dá:

—Jalóho cúní ñá cacomí Ndióxí cuénta sahun —nacachi Jesús.

Tá nandihi cán ni in ga na coó nasahan ndeé ini na ndaca tuhun ga na mé á.

Ndáca tuhun na Jesús ndáchí naquixi a

(Mt. 22:41-46; Lc. 20:41-44)

³⁵Ndácaan Jesús veñuhu cáhnu jánaha nuú ñayivi já cáchí a já xihin ná:

—Ndávaha cáchí na jánaha ley Moisés ñá vaxi Cristo chichi David. ³⁶Ta sa mé David tá nachutú ndaa ini da xihin ínima yii Ndióxí já nacachi da já:

Já nacachi Ndióxí xihin xitoho i:

“Cacoo xoo cuáha i yóho,

anda quiahva ná caja i ñá ná cacomún cuénta sahá na co cúní yohó”, nacachi Ndióxí sanahá.

³⁷Ndávaha cáchí na ñá vaxi Cristo chichi David joo mé tiempo cán nacachi David ñá cúú á xitoho da —nacachi Jesús.

Ta cuáha ndivaha ñayivi cájii iní na táa jóho na nu cáhan Jesús.

Chícaan Jesús cuáchi jatá na jánaha ley Moisés

(Mt. 23:1-36; Lc. 11:37-54; 20:45-47)

³⁸Tá jánaha Jesús na já cáchí a já xihin ná:

—Cuénta coo ndó xihin na jánaha ley Moisés jáchi cátóó na cándixi na jáhma nání caca nuu na. Ta cátóó na cahan toní ñúhú ndivaha ñayivi xihin

ná tá xíca nuu na nuú yahvi. ³⁹Ta tá cuahān na veñuhu cátóo na cacoo na nu sácoo na íin chága saha. Ta tá cuahān na víco nuú vaha cátóo na coo na. Cuéntá coo ndó xihín na yóho. ⁴⁰Jáchí cándaa na vehe najihí cuáan ta tá nandihí cuahá ndivaha xíca tahví na nu Ndióxi jáchí cúní na jájahví na nuú ña núu cája na. Mé a ndaa ná cahan i xihín ndo ña mé na jánaha ley Moisés yóho cacuu na na ndoho chága ini caja Ndióxi —cáchi Jesús.

Ña najoco in ña cuáan ndáhví

(Lc. 21:1-4)

⁴¹In tañu íin coo Jesús ini veñuhu cáhnu cán yati nu íin sato nu táan na jiuhún jóco na nu Ndióxi. Ta sádehé a ndá quiahva táan ñayivi jiuhún ini mé sato cán. Ta naxini a cuahá taa cuicá xínu coo táan cuahá na jiuhún ini mé sato cán. ⁴²Ta mé já naxinu coo in ña cuáan ndáhví ta nataán ña ivi jiuhún ña núu yahvi ini mé sato cán. ⁴³Já nacana Jesús na xíca tuun xihín á ta já cáchi a já xihín ná:

—Mé a ndaa ná cahan i xihín ndo ña cuaha chága jiuhún nasahan ña cuáan ndáhví yóho a juú ga tóco ndihí java ga na cán. ⁴⁴Jáchí tóco ndihí na cán nasahan na ña yójó nu ná joo ña cuáan ndáhví yóho nasahan ña nu Ndióxi tóco ndihí ña cómí ña catacu ña —nacachi a xihín ná.

Cáxi tuhun Jesús nu ná ña vaxi quivi ndihí sahá veñuhu cáhnu ñuu Jerusalén

(Mt. 24:1-2; Lc. 21:5-6)

13 Tánaquee Jesús veñuhu cáhnu cán já nacachi in da xíca tuun xihín a cán já:

—Maestro, candehe ndó ndaja náhnu yuu nacavaha na veñuhu yóho ta ndaja jícó ndivaha nacavaha na ña —nacachi da.

²Anda já nacachi Jesús já xihín dá:

—Mé a ndaa náhnu a joo ndá chuun cúú á jáchí ni janda in yuu yóho a cándoo jatá inga yuu jáchí vaxi quivi tá nditaní ndihí ña yóho —nacachi a.

Ndícani Jesús ña coo tá ná cayati quivi ndihí sahá ñuyíví

(Mt. 24:3-28; Lc. 21:7-24; 17:22-24)

³Anda já nasahan na cán yúcu yító Olivo, ña xító ndaa táhan xihín veñuhu cáhnu cán. Ta tá íin coo Jesús cán já naxinu Pedro xihín Jacobo xihín Juan xihín Andrés já nacahan jehé na xihín á já cáchi na já:

⁴—Cúní nde ña ná caxi tuhun ndó xihín nde ndá ama coo tóco ndihí ña yóho. Ta ndaja coo tá sa nacayati mé quivi cán —nacachi na.

⁵Já nacachi Jesús já xihín ná:

—Cuéntá coo ndó ta a quiahva ndó ñamaní jándahvi ni in ñayivi ndohó. ⁶Jáchí cuahá ndivaha na quixi na cuéntá mí i ta cahan na ña tuhún tá cachi na já xihín ndó: “Yehe cúú Cristo, da nachindahá Ndióxi cacomí cuéntá sahá ñayivi.” Ta xihín ña yóho cuahá ndivaha ñayivi jándahvi na.

⁷Joo tá nacasáhá xini johó ndó ña yóho cáa cúu tondóhó, a cáyihví toho ndó jáchi quiahva já ndítahan coo. Joo cámaní yíi xinu coo quivi nu ndíhí. ⁸Jáchí ñayivi ndúu in nación ndicuítá na caní táhan na xihín na ndúu inga nación ta caní táhan na in ñuu xihín na inga ñuu. Ta quixi nditáán ndijáa nu ndúu ñayivi já xinu tama ndeé ta já casáhá na ndivaa na. Ta tóco ndihi ña yóho cúú á tá cava sahá sahá ña núu vaxi nuú ñayivi jáchi cámaní xinu coo chága nuú ndoho ini na.

⁹Joo candaa vaha ndó mé ndó jáchi ndiquiahva na ndohó ndahá na cómí chuun ta caní na ndohó ini veñuhu. Ta sahá yehe cañehe na ndohó nuú na cómí cuéntá sahá ñayivi xihín nuú na cúú jutixia ta já cuu cahan ndó sahá i nuú na cán. ¹⁰Joo jihna ñúhú xini ñúhú ndicuítá nuu tuhun vaha saha mí i nu tóco ndihi ñayivi anda jáví ndihi saha ñuyíví yóho. ¹¹Ta tá ná cañehe na ndohó cuhun ndó nuú na jutixia, a ndícani ini ndó sahá ndá tuhun cahan ndó xihín ná. Mé hora já cahan ndó ña quiahva Ndióxi nu ndó cahan ndó. Jáchi a juú jini mé ndó quixi ña cahan ndó. Ínima yii Ndióxi cacuu ña quiahva tóco ndihi ña cahan ndó. ¹²Ta java taa jicó túhún da ñani da ta java da jicó túhún da jahyi da ña ná cahní ñahá na. Ta cuaha ná ndicuítá na caní táhan na xihín tátá na ta cahní ñahá na. ¹³Ta ndaja táhan ñayivi ndúu ñuyíví yóho candají na ndohó sahá yehe. Joo ndá na ná candico tuun íchi mí i janda ná xinu quiví quivi na, na jan cacuu na cacu ndaa ínima.

¹⁴Na cáhvi tutu ná candaa ini na ña cahan. Daniel cúú da nacahyí sanahá sahá in ña quini ña jativí ñahá. Tá ná cuni ndó ña cándichi in a nuú co ndítahan coo a já ndítahan nuú na ndúu estado Judea cunu na cuhun na chí yucu. ¹⁵Ta ndá na cánúu jini véhe mé quivi já co ndítahan nuu na tavá na ñaha vehe na. ¹⁶Ta ndá na ndúu yucu co ndítahan ndicó coo na vehe na ndiquehe na jáhma ná. ¹⁷Ndáhví najihí, mé na ñúhu jahyi mé quivi já. Ta ndáhví na ñehe ndaa na valí táhan ña chíhí yii. ¹⁸Caca tahví ndó nu Ndióxi ña ná a cacuu a tiempo vixi tá ná cunu ndó cuhun ndó já ná a ndóho chága ini ndó. ¹⁹Jáchí quiví ndoho ndivaha ini ndó cacuu a cán. Jáchi janda tá nacava sahá saha ñuyíví coo nandoho ini na tá quiahva ndoho ini na mé quiví jan. Ta tá ná yaha ña jan, a ndicó coo ga ña ndoho ini na quiahva já. ²⁰Ta tá ná a ndája cuítí Ndióxi tiempo yóho ni in ñayivi a cúu cacu ndaa. Joo nasacu ini a ndaja cuítí a mé tiempo yóho jáchi quíhvi ini a tóco ndihi na nacaxi mé á.

²¹Ta tá ná cachi in na xihin ndó: “Candehé ndo, yóho íin Cristo, da nachindahá Ndióxi cacomí cuéntá sahá ñayivi”, á tá ná cachi na: “Candehé ndo, cáa íin da”, cachi na já quéa a cándúsa toho ndó na. ²²Jáchí quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúú ná. Ta quixi cuahá ná ta cachi na cahan na cuéntá Ndióxi ta jári caja na cuahá nuú ña náhnu xihín ña xitúhún ña ná jándahvi na ñayivi. Ta anda na sa nacaxi Ndióxi jándahvi na tá ná cuu caja na ña. ²³Xíní ñúhú candehé vaha ndó mé ndó jáchí sa nacaxi tuhun yachí ndihi i ña yóho xihin ndo —nacachi Jesús.

Ndaja coo tá ná xinu coo quiví quixi tucu Jesús

(Mt. 24:29-35,42,44; Lc. 21:25-36)

²⁴Já cáchí tucu Jesús já:

—Joo tá sa nayaha tóco ndihi ña nandoho ini ñayivi já canaá nuú candii ta a ndíyehé ga yoo. ²⁵Anda indiví quee quimi cuyu rí nu ñúhu ta quiji nuu indiví ña nacavaha Ndióxi. ²⁶Anda já cuni na yehé quixi i tañu vico xihin tóco ndihi ndée cáhnu i, da nachindahá Ndióxi nduu ñayivi. Ta cuni na ndá quiahva cáhnu cúú yehé. ²⁷Ta tá nandihí já chindahá i táto mí i ña ná jánditaca na na sa nacaxi i tañu tóco ndihi nuu janda níí cúú sahá ñuyiví ta janda níí cúú sahá indiví.

²⁸Catiahva ndó ña cúní cachi mé quiahva sácú u nu ndó sahá titó ñuhú. Tá yúta ndáha dó cán ta vaxi núma válí do já candaa ini ndó ña vaxi tiempo ihní. ²⁹Ta quiahva já cacuu ña yóho tá ná cuni ndó yaha tóco ndihi ña yóho. Jáchí anda jáví candaa ini ndó ña nacayati tiempo quixi tucu yehé ñuyiví yóho. ³⁰Mé a ndaa ná cahan i xihin ndó ña yaha tá yaha tóco ndihi ña nacachi i xihin ndo ta anda jáví quivi na ndúu tiempo viti. ³¹Ta ndihi sahá indiví xihin ñuyiví joo a ndíhi toho sahá tuhun nacahan i xihin ndó yóho. Jáchí coo tá coo va ña.

³²Joo ni in túhún toho ñayivi co xíní na ndá quiví á ndá hora yaha ña yóho. Ta ni mé táto Ndióxi ndúu indiví co xíní na ndá quiví coo ña yóho. Ta ni yehé, da cúú in túhún jini já jahyi Ndióxi co xíní ndá quiví coo ña yóho. In túhún Ndióxi, tátá yo quéa xíní a.

³³Sahá ña cán quéa cañuhu ini ndó sahá ña yóho. Coo tiahva ndó ta caca tahví ndo nu Ndióxi jáchí co xíní ndó ndá quiví xinu coo ña yóho. ³⁴Jáchí ña yóho cúú á tátuhun in dataa quéta cuahan xicá joo tá cámaní quee da cuhun da jándacoo tóo da vehe da nu mozo da ña ná candaa na ña. Ta sahan da chuun caja in in mozo da. Ta nuú da ndáá yéhé nasahnda da chuun ña ná candaa vaha da ña. ³⁵Sahá ña cán quéa xíní ñúhú coo tiahva ndó jáchí co xíní ndo ndá quiví xinu coo mé da cúú xitoho vehe. Co xíní ndo á cacuu a tá nacuaá tóo á cacuu a java ñuú táji á cacuu a tá

naçana chéle á cacuu a tá sa nativi. ³⁶Cuéntá coo ndó. A juú tiaḥva náá xinu coo da ta ndiñehē dá ndohó ndúu ndó quíji ndo. ³⁷Ña cáhan i xihín ndó cáhan i xihín ndihi na: Xíní ñúhú coo tiaḥva ndó saḥa mé quívi quixi tucu u —naçachi Jesús.

Ndítúhún jehé na tiin na Jesús

(Mt. 26:1-5; Lc. 22:1-2; Jn. 11:45-53)

14 Tá cámaní ivi quívi caja na vicó pascua xihín víco tá xíxi na pan ña co quée yusá naxaa xihín já naçasáhá na sacuaḥa nuú jutú xihín na jánaḥa ley Moisés ndúcú na ndá quiaḥva caja na tiin jehé na Jesús já cuu cahní na a. ²Ta já cáchí xihín táhan na:

—A tiin toho í da mé víco jáchí tiaḥva náá ndivaa ñayivi —naçachi na.

Tá nachojo in ñañaḥa perfume jini Jesús

(Mt. 26:6-13; Jn. 12:1-8)

³Ta ndaja coo íin Jesús ñuu Betania vehe Simón, da cáhan na xihín: taa nandoho cueḥe táhyi. Ta nani ndúu coo na nu mesa cán naxinu in ñañaḥa ta ñéhe ñá in yúyú alabastro nachutú jíní a xihín perfume, dó támi ndivaha sahan ta cúú dó perfume yahvi ndivaha. Ta natahví ñá yóho mé yúyú cán já nachojó ña do jini Jesús. ⁴Ta java na ndúu cán naçasáhá na jáa ná xihín ña já naçasáhá cáchí xihín táhan na já:

—Ndávaḥa nativi uun perfume yóho. ⁵Cuu jicó yó do, nduu ta yáha ga nuú uni ciento denario quehé saḥa dó ta xihín jiuḥún cán cuu chindeé yó na ndahví, nduu —cáchí na.

Sahá ña cán quée naxojo ini na xihín ñañaḥa cán ta naçahan núu na saḥa ña.

⁶Anda já naçachi Jesús já xihín ná:

—A cáhan ndó xihín ña. A jáquihvi ndó ña. Ña vaha quée naçaja ñá yóho xihín i. ⁷Jáchí na ndahví ní tiempo canduu na tañu ndó ta cuu caja ndó ña vaha xihín ná ndá tañu cúni mé va ndó joo yeḥe a cóo tuun toho i xihín ndo. ⁸Mé ñá yóho naçaja ñá janda nuú naxinu ndée ñá caja ñá xihín i. Sa najándicuchu yachí va ñá yóho yiquí cuñu i xihín perfume, dó támi sahan jan ña ná coo tiaḥva vi tá ná casaa quívi nduxu. ⁹Mé a ndaa ná cáhan i xihín ndo ní cúú ñuyívi nuú caca nuu ñayivi cáhan na tuhun vaha saḥa mí i já quée ndicani na ña naçaja ñá yóho xihín i já ndicuhun ini na saḥa ña —naçachi a.

Jicó túhún Judas Jesús

(Mt. 26:14-16; Lc. 22:3-6)

¹⁰Ta ndaja coo in táhan da uxu ivi xíca tuun xihín Jesús, da naní Judas Iscariote naçahan da cáhan da xihín na sacuaḥa nuú jutú. Já naçahan da

tuhun da nuú na cán ña ndiquiahva da Jesús ndáha ná. ¹¹Tá naxini johó na cán ña nacachi da xihín ná nacavatá na ta nasahan na tuhun na nu mé Judas ña quiahva na jiuuhún nu dá. Ta sa mé nani já nacasáhá Judas ndúcú da ndaja cuu caja da ndiquiahva da Jesús nu ná.

Tá naxijíni ndayí Jesús xihín na xíca tuun xihín á

(Mt. 26:17-29; Lc. 22:7-23; Jn. 13:21-30; 1 Co 11:23-26)

¹²Mé quiví nuú víco pascua tá xíxi na pan ña co quée yusá naxaa xihín já sáhní na ndicachi válí jóco na nu Ndióxi. Já nandaca tuhún na xíca tuun xihín Jesús mé á já cáchí na já xihín á:

—Ndáchí cúní ndó cuhún nde caja ndíví nde cajíni ndó víco pascua —nacachi na.

¹³Anda já nachindahá Jesús ivi da xíca tuun xihín á já cáchí a já xihín dá:

—Cuáhán ndó ñuu jan jáchi jan ndiñehe ndó in dataa ñehe da in yoo ticuú ta candico ndó da cuhún ndó. ¹⁴Tá ná xinu da vehe nuú ndihvi da já cachi ndó xihín da cúu xitoho vehe cán já: “Da jánaha ndehe cáchí xuhún: Ndáchí íin nuú coo i cajíni i víco pascua xihín na xíca tuun xihín i.”

¹⁵Anda já jánaha mé da cán in cuarto cáhnu ña cánúu jini véhe piso ninu. Sa íin tiaha va ña. Cán caja ndíví ndó ña cajíni —nacachi Jesús xihín ná.

¹⁶Já naquee mé na xíca tuun xihín Jesús cán cuahan na ta tá naxinu na ñuu cán nasahin tá íin cáchí Jesús xihín ná. Já naja ndíví na ña cajíni na víco pascua mé cán.

¹⁷Tá nacuaá naxinu Jesús xihín ndihuxu ivi na xíca tuun xihín á. ¹⁸Ta tá ndúu coo na nu mesa xíxi na já nacachi Jesús já xihín ná:

—Mé a ndaa ná cahan i xihín ndó ña in táhan ndó, da ndúu coo xíxi xihín i nu mesa yóho cacuu da jicó túhún yehe —nacachi a.

¹⁹Anda já nacasáhá na cán cácuéha ini na já nacasáhá tá in tá in na ndaca tuhún na mé á já cáchí na já xihín á:

—Á yehe cacuu da jicó túhún mé ndó.

Já nacachi inga tucu da já:

—Á a juú yehe cacuu da.

²⁰Anda já nacachi Jesús já:

—In táhan ndó da cúu uxu ivi, da in ndúu xíxi xihín i ini cohó i, da cán cúu da jicó túhún yehe. ²¹Yehe cúu da nachindahá Ndióxi nduu ñayivi ta ndítahan nuú i quivi i tá íin cáchí tuhún Ndióxi. Joo ndáhví nahá nacuu da jicó túhún yehe. Janda vaha chága ná a cácu da, nduu —nacachi a.

²²Nani xíxi na ndúu na natiin Jesús pan já nandiquiahva ndixahvi nu Ndióxi. Tá nandihi nasahnda java ña ta nasahan ña nu ná já cáchí a já xihín ná:

—Júhun ndó jáchi ña yóho cúú tátuhun yiquí cuñu i —ñacachi a.

²³Tá nandihí natiin a in vaso nu ñúhu tó uva já nandiquiahva ndixahvi nu Ndióxi. Ta nasahan mé á do nuú na cán ta tá in tá in na naxihi na do.

²⁴Já ñacachi a já xihín ná:

—Dó yóho cúú dó tátuhun nií i, dó cuíta sahá cuahá ñayivi. Tá ná cuíta nií i já candaá ini ndó ña najáxiñu coo Ndióxi tuhun a nasahan sanahá.

²⁵Mé a ndaa ná cahan i xihín ndo ña a cóho ga i tó uva janda quiahva ná xiñu coo quiví coho tucu u inga dó vaha chága tá ná xiñu quiví cacomí Ndióxi cuéntá sahá ñayivi —ñacachi a.

Cáxi tuhun Jesús ña chijehé tuhun Pedro ña xíní da mé á

(Mt. 26:30-35; Lc. 22:31-34; Jn. 13:36-38)

²⁶Tá nandihí naxita na in canto já ñaquee na cuahan na yucu yitó Olivo.

²⁷Anda já ñacachi Jesús já xihín ná:

—Tóco ndihí ndó jándacoo ndó yehe ñuú viti jáchi já cáchí tuhun Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cuhun ri”, cáchí tuhun Ndióxi. ²⁸Joo tá nandihí nditacu tucu u ta já cuhun jihna ñúhú yehe estado Galilea anda já cuhun mé ndó —ñacachi a.

²⁹Anda já ñacachi Pedro já xihín Jesús:

—Vatí ná jándacoo ndihí na mé ndó joo a jándacoo toho i ndohó —ñacachi da.

³⁰Anda já ñacachi Jesús já xihín dá:

—Mé a ndaa ná cahan i xuhun mé ñuú viti tá cámaní cana ivi chéle já chijehé tuhún ña xínún yehe uní tañu —ñacachi a.

³¹Já ñacasáhá ndúcú ndéé Pedro cahan da já cáchí da já:

—Vatí ná quivi i xihín ndo joo a chíjehé tuhun toho i sahá ña xíní i mé ndó —ñacachi da.

Ta mé quiahva já ñacachi ndihí na cán xihín á.

Tá xíca tahví Jesús tañu yitó olivo naní a Getsemaní

(Mt. 26:36-46; Lc. 22:39-46)

³²Anda já naxinu na cán in nuú naní Getsemaní já ñacachi Jesús já xihín na xíca tuun xihín á:

—Yóho cacoo ndó nani ná cuhun i cáa caca tahví i nu Ndióxi —ñacachi a.

³³Ta ndáca Pedro xihín Jacobo xihín Juan cuahan xihín á. Ta ndaja coo ñacasáhá cácuéha ini a ta a juú quiahva táhvi ini a. ³⁴Já ñacachi a já xihín ná:

—Cácuéha ndivaha ini i chí quivi i cúu ini i. Yóho candoo tóo ndó ta coto a cúju ndo —ñacachi a.

³⁵Anda já naquee Jesús cuahan chága chí nuu já nacaxítí a janda quiahva naxinu coo nuu á nu ñúhu cán. Já naxica tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuu. ³⁶Já cáchí a já xíca tahví a nu Ndióxi:

—Tátá Ndióxi, tóco ndihi ñaha cuu caja ndó. Chindeé ndó yehe ná a ndóho i ña ihvi ndivaha ña vaxi nuú i ndoho i. Joo ná coo tá íin cúni mé ndó ta ná a cóo toho ña cúni yehe —nacachi a.

³⁷Anda já nandicó coo a nu ndúu na xíca tuun xihin á cán ta já nandinehe á na quíji na ndúu na. Já nacasáhá cáchí a já xihin Pedro:

—Á quíji vún, Simón. Á cóo nacu canditún ni in hora. ³⁸Xíní ñúhú coo tiahva ndó ta caca tahví ndo nu Ndióxi já ná a cóto ndojó rí quini ndohó. Mé a ndaa ínima ñayivi cúni a ndinducú a Ndióxi joo yiquí cuñu na co íin tiahva caja ña cúni Ndióxi —nacachi a.

³⁹Anda já naquee tucu a cuahan caca tahví a nu Ndióxi. Ta sa mé tuhun nacañan nu cuítí cán nacañan tucu a chí ivi. ⁴⁰Ta tá nandicó coo a nandinehe tucu a na xíca tuun xihin á cán ndúu na quíji na jáchí naquehe a mahnú na. Ta chí co xini na ndá tuhun nducú ñehe na nu Jesús sahá ña quíji na. ⁴¹Tá nandicó coo a táhndá uní já nacachi a já xihin ná:

—Vatí cúni ndó cuju ndo ta vatí cúni ndó ndiquehe ndée ndo joo a cúu caja ndó ña viti. Jáchí sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi. ⁴²Cuáhán ndacoo ndó ná cohó. Jáchí sa vaxi da jícó túhún yehe —nacachi a.

Tá natiin na Jesús

(Mt. 26:47-56; Lc. 22:47-53; Jn. 18:2-11)

⁴³Ta nani cáhan yii va Jesús cándichi a já naxinu Judas, da cúu in táhan da uxu ivi xíca tuun xihin Jesús cán. Ta xihin mé da cán vaxi cuahá ñayivi ñehe na machiti xihin yito viti. Mé na vaxi cán cúu ná na vaxi cuénta na sacuahá nuú jutú xihin nuú na jánaha ley Moisés xihin nuú na sacuahá veñuhu. ⁴⁴Ta mé Judas, da ndiquiahva mé á nuú na cán sa nacandoo da xihin na cán ña tatí yúhu dá sajóho Jesús jáchí nacachi da já xihin ná:

—Mé da ná tatí yuhú u sajóho, da cán cúu dá tiin ndó ta cató tuun ndó da cañehe ndó cuhun ndo —nacachi da.

⁴⁵Ta tá naxinu da cán chí ivi laá nacayati da nu Jesús já cáchí da já xihin á:

—Maestro, maestro.

Já natatí yúhu dá sajóho a. ⁴⁶Anda já natiin tuun na Jesús.

⁴⁷Joo in táhan da xíca tuun xihin Jesús cán natavá da machiti da já nachitúhun dá in johó da cúu mozo da sacuahá nuú jutú cán. ⁴⁸Anda já nacachi Jesús já xihin na naxinu tiin ñahá cán:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihín machiti ta xihín yíto. ⁴⁹Ndijáá ní quivi nasahiin i tañu ndó jan ta najánaha i ndohó ini veñuhu cáhnu ta ni in tañu coó natiin ndó yehe. Joo tóco ndihi ña yáha yóho xíní ñuhú yaha ña já ná xinu coo nuú ña nacahyi sahá i ini tuhun Ndióxi —nacachi a.

⁵⁰Anda já naxinu ndihi na xíca tuun xihín Jesús cán cuahan na ta najándacoo na mé á.

Tá naxinu in datacú cuahan da

⁵¹Joo in datacú cátiví da in túhún jini sámana ndíco da jatá na cán cuahan da ta natiin na da. ⁵²Joo najaní da mé dá ta nacando sámana da já naxinu lahla da cuahan da.

Nasacu na Jesús nuú nataca ndihi na sacuahá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Anda já nasañehe na Jesús nasahan na nuú da cúu sacuahá chága nu ndíhi jutú. Ta nandique táhan tóco ndihi na sacuahá nuú jutú xihín na sacuahá veñuhu xihín na jánaha ley Moisés. ⁵⁴Ta nasandico xíca Pedro Jesús anda quiahva naxinu da yéhe vehe da cúu sacuahá chága nu ndíhi jutú cán. Já nasacoo da xihín da ndáa veñuhu cáhnu cán xítuní da yati yávi núhu cán.

⁵⁵Ta na sacuahá nuú jutú xihín tóco ndihi na cómi cuénta sahá na Israel nataca na cán ndúcú na cuachi jácana na jatá Jesús já cuu cahní ñahá na. Joo coó cuachi jíquí ná ñehe ná chínúu na jatá mé á. ⁵⁶Ta cuahá ná nacasáhá cáhan na ña tuhún saha Jesús joo coo xinu tuhun cáhan na jáchi a cúu ndique táhan vaha tuhun na. ⁵⁷Ta nandaca ndichi java da cáhan da tuhun jíquí saha Jesús já cáchí da já:

⁵⁸—Naxini johó nde nacachi da jan já: “Jánditani i veñuhu cáhnu cán, ña nacavaha ñayivi ta tixi uní quiví jácandichi tucu u inga ga ña a cuú cavaha ndahá taa” —nacachi da.

⁵⁹Joo ni já coó nacuu ndique táhan tuhun na xihín ña nacachi na cán.

⁶⁰Anda já nandaca ndichi mé da cúu sacuahá chága nu ndíhi jutú tañu na cán já nandaca tuhún da Jesús já cáchí da já xihín á:

—Á chí a ndúcú ñehún tuhun nuú nde sahá cuachi jácojo na jatun —nacachi da.

⁶¹Joo coó nacahan Jesús ni in tuhun xihín ná já táji ní já va nasahiin a. Mé da cúu sacuahá chága nu ndíhi jutú cán nacasáhá ndaca tuhún tucu da a já cáchí da já xihín á:

—Á jivi ndusa yóhó cúun Cristo, da cúu in túhún jini já jahyi Ndióxi yii, mé da nachindahá Ndióxi cacomí cuénta sahá ñayivi —nacachi da.

⁶²Anda já nacachi Jesús já:

—Ajan, jivi yehe cúu dá. Ta vaxi quivi tá cuni ndó yehe, da nachindahá Ndióxi nduu ñayivi cacoo i xoo cuáha Ndióxi, mé a íin cuáha ndée. Ta já cuni ndó yehe ndicó coo i ñuyívi yóho tañu vico tá ná quixi i chí indivi —nacachi a.

⁶³Anda já nandatá da cúu sacuahá chága nu ndíhi jutú jáhma da ña ná candaá ini ñayivi ña xójo ini da. Já cáchí da já:

—Ndá chicuu chága yó ñayivi ndicani nu yo. Xihín ña nacahan da yóho cándaá iní ña ndája núu da Ndióxi. ⁶⁴Á sa naxini johó ndó ña ndája núu da Ndióxi xihín tuhun nacahan da. Ndaja xíní ndó caja í xihín dá viti —nacachi da.

Anda já nandique táhan tuhun ndíhi ñayivi ña ndácaan cuachi nu Jesús ña cán quéa ndítahan quivi a.

⁶⁵Java na nacasáhá na xihnu ndaa na tójií nu á ta java na nachicaji na jáhma nu á já nacasáhá cáni na jahndá nuu á já ndáca tuhún ñahá na já cáchí na já xihín á:

—Cahan xihín nde yo nacani yohó viti —nacachi na.

Ta janda na ndáá veñuhu cáhnu cán viti nacasáhá cáni na jahndá nuu á.

Tá nachijehé tuhun Pedro ña xíní da Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶Ta ndaja coo Pedro íin yíi dá xítúní da cán já naxinu in ña cája chúun xihín da cúu sacuahá chága nu ndíhi jutú. ⁶⁷Já naxini ña xítúní Pedro ta nahá vaha nasandehé ña nu dá já cáchí ña já:

—Yóhó cúun táhan da xíca tuun xihín Jesús, da ñuu Nazaret —nacachi ña.

⁶⁸Joo nachijehé tuhun da ña xíní da Jesús já cáchí da já:

—Uhun. Co xíní toho i da ta co xíní toho yehe ndá saha cáhun —cáchí Pedro.

Anda já nacayati da yuyéhé ta ivi laá nacana chéle. ⁶⁹Tá naxini mé ña cája chúun xihín da cúu sacuahá chága nu ndíhi jutú cán ña nasandichi tóo da yéhé cán já nacasáhá ña cáxi tuhun ña xihín tóco ndíhi ñayivi ndúu cán já cáchí ña já:

—Candehé ndó. Da cáa cúu in táhan da xíca tuun xihín Jesús —nacachi ña.

⁷⁰Nacachi tucu Pedro ña co xíní da Jesús. Chá va nayaha ña yóho ta já nacachi na ndúu xítúní cán xihín Pedro:

—Táhan ri da cáa va cúu yóhó jáchí cúun da Galilea ta cáhun tátuhun cáhan na cán —nacachi na.

⁷¹Anda já nacasáhá Pedro cánahá da ta natavá da quivi Ndióxi ña co xíní da Jesús já nacachi da já:

—Ni co xíní mí i ndá taa cúu da jan, da cáhan ndó sahá jan —nacachi da.

⁷²Tá nācachi da já ivi laá nācana chéle ña chí ivi. Anda já nāndicuhun ini Pedro ña nācachi Jesús xihín dá tá nācachi a já: “Tá cámaní cana ivi chéle sa chíjehé tuhún ña xínún yehe uni tañu.” Tá nāndicuhun ini Pedro ña yóho já nācasáhá sácu ndivaha da.

Tá nāndiquiahva na Jesús ndáha Pilato

(Mt. 27:1-2, 11-14; Lc. 23:1-5; Jn. 18:28-38)

15 Tánativi inga quiví itaan já nāndique táhan na sacuahā nuú jutu xihín na sacuahā veñuhu xihín na jánahā ley Moisés xihín ndihi na cómí cuéntá sahā na Israel. Já nācató na Jesús ñéhe na a cuahan na já nāndiquiahva na mé á nu Pilato. ²Ta mé Pilato nāndaca tuhún da Jesús já cáchí da já xihín á:

—Á mé a ndaa cúún in rey, da cómí cuéntá sahā na Israel.

—Ajan. Jivi cúú u tá quiahva cáchí ndo jan —nācachi Jesús xihín dá.

³Ta najácojo na sacuahā nuú jutu cán cuahā cuachi jata Jesús. ⁴Já nāndaca tuhún tucu Pilato Jesús já nācachi da já xihín á:

—Ndávaha co ndúcú ñehún tuhun nuú i. Candehé ndaja cuahā nuú cuachi jácojo na jatun —nācachi da.

⁵Joo ni in tuhun coó nācahan Jesús. Tá naxini Pilato ña co ndúcú ñehe Jesús tuhun já nācatóntó da sahā ña cája.

Sácú ini na saha Jesús ndaja caja na ña ná quivi a

(Mt. 27:15-31; Lc. 23:13-25; Jn. 18:38-19:16)

⁶Tañu mé víco pascua nasahiin costumbre Pilato ña janí da in da ndácaan vecaa. Ndá da cúni ñayivi janí da, da cán cúú da janí da. ⁷Ta ndaja coo mé já ndácaan in da naní Barrabás vecaa xihín java ga da naxica xihín dá. Ndácaan da vecaa sahā ña nasahní da ndii tá nādivaa ñayivi.

⁸Chí naxinu ñayivi nu Pilato já nācasáhá na cáhan na xihín dá ña ná caja da tá quiahva sá caja da. ⁹Joo nāndaca tuhún Pilato na já cáchí da já:

—Á co cúni ndó ña ná janí i da cúú rey nuú ñayivi Israel yóho —nācachi da.

¹⁰Nācachi Pilato ña yóho jáchí xini da ña nāndiquiahva na sacuahā nuú jutu cán Jesús nu da sahā ña cáhiví ini na xihín á. ¹¹Joo na sacuahā nuú jutu cán nācasáhá na jándinihi na ñayivi ña ná cachi na xihín Pilato ña ná janí da Barrabás. ¹²Tá nāndihi já nāndaca tuhún Pilato na já nācachi da já xihín ná:

—Ndía cúni ndó caja i xihín da cáchí ndó cúú rey nu ndóhó, na Israel —nācachi da.

¹³Anda já nānducú ñehe ñayivi cán tuhun nu Pilato já cáchí na já xihín dá:

—Cata caa ndó da ndica crúxu.

¹⁴Já nācachi Pilato já xihín ná:

—Ndá cuachi nācāja da, vāha.

Joo ví ga ví cáyuhú cóhó nā já cáchí nā já:

—Cata caa ndó da ndica crúxu.

¹⁵Ta sahá ña cúnī Pilato candoo vāha da nuú ñayivi nājaní da Barrabás. Ta tá nandihī najácaxáhan na Jesús já nandiquiahva da a ndáha nā cūhun cata caa ñahá nā ndica crúxu.

¹⁶Anda já ñéhe soldado Jesús cuahan nā yuyéhe vechúun cán. Já najánditaca soldado cán java ga táhan da. ¹⁷Já nāchinúu na in jahmá cuáhá túun jata Jesús ta nāchinúu na in tiyivi íñu jini á. ¹⁸Tá nandihī já nācasáhá nā cáyuhú nā já cáchí nā já:

—Cáhnū nahá ná cacuu yóhó, da cúú rey nuú nā Israel —cáchí nā sácū ndaa ñahá nā.

¹⁹Tá nandihī nācasáhá cáni na yiquí jini a xihín in ndoo ta nācasáhá nā xihnu ndaa na tójií nā nuu á já nācasáhá nā cáxítí nā nu á ña cája na tátuhun cája cáhnū na a. ²⁰Tá nandihī nācācu ndaa na a já nātavá nā jáhma cuáhá túun ña nāsanúu jata. Ta najándaca ndixi na a xihín jáhma mé á já nāsañehe na a cuahan nā cata caa na a ndica crúxu.

Tá nācata caa na Jesús ndica crúxu

(Mt. 27:32-44; Lc. 23:26-43; Jn. 19:17-27)

²¹Tá ñéhe na Jesús cuahan nā cata caa na a ndica crúxu já nandique táhan na xihín in da vaxi da ndihvi da ñuu Jerusalén. Mé da cán naní da Simón, da ñuu Cirene, da cúú tátá Alejandro xihín Rufo. Já nācāja ndúsa ná xihín dá ña ná ndicojo da crúxu nuú cata caa na Jesús.

²²Já nāsañehe na Jesús nāsañan nā in xiquí naní Gólgota. Tuhun yóho cúnī cáchí a: nu ndúu lása yiquí jini ndi. ²³Cán nāsañan nā vino nu Jesús, dó nācāva táhan xihín jusa ña naní mirra. Joo coo nāxeen toho a coho a do. ²⁴Anda já nācata caa na a ndica crúxu. Já nācasáhá soldado cán sājíquí da saha jáhma Jesús ta nācachi xihín táhan da ña ndá da ná quee vāha cuu quehe in in jáhma Jesús.

²⁵Ta cúú á tátuhun caa in naha tá nācata caa na Jesús ndica crúxu cán. ²⁶Ta jini ndica crúxu cán nācāhyí nā ndá sahá nācata caa na a ta já cáchí a já: “Da yóho cúú rey nuú nā Israel.” ²⁷Ta sa mé já nācata caa na ivi taa cuihná xihín Jesús: in da xoo cuáha ta in da xoo íti. ²⁸Ta xihín ña yóho nāxinu coo tuhun Ndióxi tá cáchí a já: “Tañu taa quini nācācu na a.”

²⁹Chí cáva jini mé ñayivi yáha cán cánahá nā xihín á já cáchí nā já: —Candehé. Yóhó cáchún ña jánditanun veñuhu cáhnū cán ta tixi uní víxí quiví cáchún jácandichi tucún ña. ³⁰Jācācu mún. Cuáhán nuu ndica crúxu jan —nācachi na sácū ndaa ichi nā.

³¹Ta quiahva já cája na sacuahā nuú jutū cán xihín na jánahā ley Moisés sácū ndaa ñahá na. Ta nacasáhá cáhan xihín táhan na já cáchí na já:

—Nacuu nacaja Jesús jácacu da java ga ñayivi joo viti a cuú jácacu da mé dá. ³²Tá ta mé a ndaa cúú dá Cristo, da cúú rey nuú na Israel ná nuu da ndica crúxu viti ñúhú já ná candúsa nde da —cáchí na.

Ta janda da ivi táhan ndácaa ndica crúxu jín á cán cánahá da xihín á.

Tá naxihí Jesús

(Mt. 27:45-56; Lc. 23:44-49; Jn. 19:28-30)

³³Tá naxinu coo caxivi ndaa nacanaá ní cúú ñuyiví ta janda caa uni sahini já nacasáhá nandiyehē tucu. ³⁴Ta sa mé hora já nacayuhú cóhó Jesús já cáchí a já:

—Eloi, Eloi, lama sabactani —nacachi a.

Tuhun yóho cúní cáchí a: Ndióxi mí i, Ndióxi mí i, ndávaha najándacoo ndáha ndó yehē.

³⁵Ta java na ndíta cán naxini johō na tuhun cáchí a. Já nacachi na já:

—Cuni johō ndó jáchi cána da profeta Elías —nacachi na.

³⁶Anda já xínu in da nasahan da nachindaxi da in ticoto ini vino iyá. Já nacató da mé ticoto cán nuú in yitó ndoo já nachitivi da do yati yúhu Jesús ña ná coho a do. Já nacachi da já xihín java da cán:

—Cóho candehó á quixi Elías jánuu a da ndica crúxu —nacachi da.

³⁷Anda já nacayuhú cóhó Jesús já naxihí a. ³⁸Anda já nandatá java ndaa jáhma ndeé ña sájí nuu nuú yí ndivaha veñuhu cáhnu ñuu Jerusalén cán. Janda jini á ta janda sahá nandata. ³⁹Ta ndaja coo in dataa, da sáhná chuun nuú soldado cuéntá Roma nasahiin da nu ndácaa Jesús cán ta tá naxini da naxihí a já nacachi da já:

—Mé a ndaa táhyí cúú da yóho in túhún jini já jahyi Ndióxi —nacachi da.

⁴⁰Ta nasanduu java najihí ta sándehe xicá na Jesús. Tañu na yóho nasandacaan ña naní María, ña ñuu Magdala xihín María, ña cúú náná Jacobo, da loho chá nuú José xihín in ña naní Salomé. ⁴¹Nasandico najihí yóho jata Jesús ta nachindeé ñahá na tá nasahiin a estado Galilea. Cuahá ga najihí nasanduu cán ta java na cúú ná na nasahan xihín á ñuu Jerusalén jihna tá cámaní quivi a.

Tá najánduxu na Jesús

(Mt. 27:57-61; Lc. 23:50-56; Jn. 19:38-42)

⁴²Tá nacuaá too uun quiví viernexe tá cámaní casaa quiví ndíquehe ndeé na Israel já nayaha tóco ndihi ña yóho. ⁴³Ta ndaja coo íin in da naní José, da ñuu Arimatea, da cúú táhan na cómí cuéntá sahá na Israel. Mé José yóho ndáti da casaa quiví cacomí Ndióxi cuéntá sahá ñayivi ñuyiví yóho. Ta nasahan ndeé ini da cūhun da cahan mání dá xihín Pilato sahá

yiquí cuñu Jesús ña ná quiahva mé Pilato ña nu dá. ⁴⁴Chí nacatontó Pilato tá nacandaa ini da ña sa naxihí Jesús. Já nacana da da sáhdá chuun nuú soldado da já nandaca tuhún ñahá da á sa naxihí Jesús. ⁴⁵Tá nacaxi tuhun da cán nu Pilato ña sa naxihí Jesús já nasahan Pilato ñamani nuú José ña ná ndiquehe da yiquí cuñu Jesús. ⁴⁶Anda já naxeen José in jahmá vaha ta najánuu da yiquí cuñu Jesús ndica crúxu já nachitiví da ña xihín mé jahmá vaha cán. Tá nandihi já nachicaan da mé yiquí cuñu Jesús cán ini in yávi ndácaan ndica cáva. Tá nandihi já nachijahvi da yuhú cáva cán xihín in yuu jáhdá cáhnu. ⁴⁷Ta ndaja coo María, ña ñuu Magdala xihín María, náná José nasandehé na nuú nasacu na yiquí cuñu Jesús ini mé cáva cán.

Tá nanditacu tucu Jesús

(Mt. 28:1-10; Lc. 24:1-12; Jn. 20:1-10)

16 Ta tása nayaha quivi ndiquehe ndée na já nasahan María, ña ñuu Magdala xihín María, ña cúu náná Jacobo xihín Salomé viti naquee na cuahan na cueen na java nuú ñaha támi sahan ña chindáa na yiquí cuñu Jesús. ²Ta naha chá mé quivi domingo tá naqueta candii já cuahan na nuú nachicaan na yiquí cuñu Jesús cán. ³Ta nani xíca na cuahan na íchi cán já ndítuhún xihín táhan na ndá quiahva caja na tavá na yuu ndájí nuú ndácaan yiquí cuñu Jesús cán. Já cáchí na já:

—Yo tavá toho yuu ndájí nuu nuú quihví ini nu ndácaan yiquí cuñu Jesús —cáchí xihín táhan na cásahan na jáchi cáhnu ndivaha mé yuu cán.

⁴Joo tá naxinu na mé cáva cán já naxini na ña coó ga yuu ndájí yuhú cáva cán. ⁵Ta tá nandihvi na mé cáva cán já naxini na cáa íin in dataa ndíxí jahmá yaa ña cán. Íin coo da xoo cuáha ta cúu dá da yúta. Tá naxini najihí yóho da cán chí nayihví na. ⁶Anda já nacahan da cán já cáchí da já:

—A yíhví toho ndó. Xíni yehe ña ndínducú ndo Jesús ña Nazaret, ña nacata caa na ndica crúxu. Candehé ndo nuú nasacu na a. Coó ga íin viti jáchi nanditacu tucu a. ⁷Ta viti cuáhán ndo caxi tuhun ndó xihín na naxica tuun xihín á ta xihín Pedro ña cánú mé á cuahan estado Galilea. Tá cuhun ndó cán já cuni ndó a tá quiahva nacachi mé á xihín ndo —nacachi táto Ndióxi.

⁸Já naquee na cán xínu na cuahan na jáchi nayihví ndivaha na anda quíji ninu na. Coó nacahan na xihín ni in ñayivi jáchi nayihví ndivaha na.

Tá naxini María, ña ñuu Magdala Jesús

(Jn. 20:11-18)

⁹Tá nandihi nanditacu tucu Jesús ta tá nativi mé quivi domingo já ña nu cuítí naxini Jesús nasacuu ña María, ña ñuu Magdala, mé ña natavá Jesús

usá rí quini nasandacaan ini ñá. ¹⁰Ta tá naxini ñá mé á já naquee ñá cuahan ñá caxi tuhun ñá nuú na naxica tuun xihin Jesús ñá tácu a. Ta ndúu cuéha ini na ta sácu na ndúu na tá nasaa ña. ¹¹Ta nacaxi tuhun ñá nu ná ña nanditacu tucu Jesús ta naxini ñá mé á joo coó naxeen na candúsa na ña.

Tá naxini ivi da naxica tuun xihin Jesús mé á

(Lc. 24:13-35)

¹²Ta tá nandihi já nandijama Jesús ndá quiahva cáa já nandaca náha á nuú ivi táhan na cuahan yúcu, na naxica tuun xihin á. ¹³Joo tá nandicuni na mé á já naquee na cuahan na caxi tuhun na xihín na java cán joo coó naxeen na candúsa na tuhun nacahan ndívi na yóho xihin ná.

Sáhdá Jesús chuun nuú na xica tuun xihin á

(Mt. 28:16-20; Lc. 24:36-49; Jn. 20:19-23)

¹⁴Tá nandihi cán nandaca náha Jesús nuú ndíhuxu in na naxica tuun xihin á nani ndúu na xíxi na. Já nacasáha jánani a na jáchi nandaja táhyí na ínima ná ta coó naxeen na candúsa na ña naxini na java cán Jesús tá nandihi nanditacu tucu a. ¹⁵Já nacasáha cáchí Jesús já xihin ná:

—Cuáhán ndo ní cúu ñuyívi yóho ta caxi tuhun ndó xihín ndihi ñayivi tuhun vaha sahá i. ¹⁶Ta ndá na ná candúsa yehe ta candúta ná já quéa cacu ndaa ínima ná ta a cúhun na indayá. Joo na co candúsa yehe, na cán cúu na cūhun na ndoho ini na indayá anda ama cáa quívi. ¹⁷Joo na cándeé ini yehe caja na ña xitúhún. Ta xihín quívi yehe tavá na ínima quini ndácaan ini ñayivi. Ta ndacahan na tuhun saá ña coó nacatiáhva na. ¹⁸Ta tá ná tiin ndáha ná coo ta tá ná coho na ña cúu cahní ñahá, a cahní toho a na. Ta tá ná chinúu na ndáha ná jiní na quíhvi já ndivaha mé na quíhvi cán —nacachi Jesús.

Tá nandaa Jesús cuahan indiví

(Lc. 24:50-53)

¹⁹Tá nandihi nacahan Jesús, xitoho í tóco ndihi tuhun yóho xihin ná anda já nandindita cuahan indiví ta nasacoo a xoo cuáha Ndióxi, tátá yo. ²⁰Tá nandihi já naquee na naxica tuun xihin á cán cuahan na caxi tuhun na tuhun vaha saha Jesús ndijáá ñuu. Ta já nachindeé Jesús, xitoho í na cán ta náha ña cúu á ña ndaa cahan na jáchi nacaja mé á ña cúu caja na cuahá nuú ña xitúhún. Já ná coo.